

Naqqiut

Siunnersuut 13. Oktober 2017-imeersoq taarserpaa

(Siunnersuummi inatsisiliornermut aaqqiinernut tunngatillugu oqaaseqaatit ilanngunneqarput.

Matumani §§ 44, imm. 2-3 aamma 45, imm. 2-3-milu aalajangersakkat annertusineqarput

(Kommuninut allanut inissiinermi), 57, imm. 2 (nuunnermi aningaasartuutitut matussusiineq)

aamma § 76, imm. 2 (Illersortinut maleruagassanik aalajangersaanermi tunngavissat).

Taamatuttaarlu allannguutinik minnerusunik allannguuteqarput §§ 18, imm. 3 (proportionalitetimut

tunngavik ilanngunneqarpoq) aamma 62, imm. 2 (politiinut paasissutissanik

ingerlatitseqqiisarnermut). Taassuma saniatigut oqaasiliorerit annikitsumik allangortinneqarneri

naqqiinerillu, kiisalu innersuussinernut naqqiutit.)

Uunga siunnersuut: Inuit innarluutillit tapersersorneqarnissaannut Inatsisartut inatsisaat nr. xx, xx. xxx 2018

Kapitali 1

Aalajangersakkat aallarniutaasut

Siunertaq aamma siunertarineqartut

§ 1. Inatsisartut inatsisaanni matumani siunertaapput:

- 1) inuit innarluutillit innarluuteqarnerup malitsigisaanik ajornartorsiutit iluarsiniarlugit siunnersorneqarnissamik tapersersorneqarnissamillu neqeroorfigineqarnissamik qulakkeeriffigineqarnissaat,
- 2) inuup innarluutillip imminut ikiorsinnaanissaanik siuarsaneq, ulluinnarni inuuneranik oqilisaassineq kiisalu inuunerinnerulersitsineq,
- 3) inuup innarluutillip ineriartorsinnaanissaanik aamma piginnaasai naapertorlugit nammineq ilippanartuinik atorluaasinnaanernik siuarsaneq,
- 4) inuit innarluutillit inuiaqatigiinni naligiimmik periarfissaqarnissaasa aammalu innarluuteqarneq pissutigalugu assigiinngisitsinissap pakkersimaarneqarnissaata tamatumuunalu sapinngisamik inuiaqatigiinni tamakkiisumik sunniuteqarluartumillu peqataanissaasa akuunissaasalu qulakkeerneqarnissaa, aamma
- 5) inuit innarluutillit sulisinnaanissaannut periarfissat siuarsarlugit.

§ 2. Allat assigalugit inuit pisinnaatitaaffiinik aamma tunngaviusumik kiffaanngissuseqarsinnaatitaanerannik tamanik tamakkiisumik inuk innarluutilik atuisinnaatitaavoq. Tamatuma piviusunngortinneqarnissaanut Inatsisartut inatsisaat manna malillugu tapersersuineq ikiuutaassaaq.

Imm. 2. Inuup innarluutillip pissusissamisoortumik ataqqinassusaa, inuttut nammineersinnaanera, matumalu ataani kiffaanngissuseqarluni aalajangiisinnaanera inunnillu allanik attuumassuteqannginnera ataqqillugu nukittorsarlugulu, Inatsisartut inatsisaat manna malillugu tapersersuineq pissaaq.

§ 3. Inuk innarluutilik ataqatigiissaagaasumik, ataqatigiissumik tamakkiisumillu isiginnittumik, inummut tunngasut tamaasa aamma inuup inuunera mianeralugit, tapersorsorneqarnissaminut pisinnaatitaavoq.

Imm. 2. Inatsisartut inatsisaat manna malillugu tapersorsuinissaq pillugu aalajangiineq, inummut innarluutilimmut pitsaanerunersoq aallaavigalugu pisassaaq.

Imm. 3. Inuup innarluutillip nammineq isumai, nammineerlunilu piginnaasai ineriartorneranilu killiffia pisuni tamani sapinngisamik mianerineqassapput.

§ 4. Inuup innarluutillip, aamma inummut taassumunnga angajoqqaatut sinniisuusup imaluunnit angajoqqaat akisussaasut kissaatigippasuk, inuk innarluutilik angerlarsimaffimminiiginnarnissaminut tapersorsorneqarnissaminik pisinnaatitaaffeqarpoq. Taamaaliorinnaanissamut piumasaqaataavoq nammineq angerlarsimaffimmiiginnarnerup, inuup innarluutillip imaluunniit allat atugarissaarnerisa navianartorsiortinneqannginnissaat.

Imm. 2. Inuk innarluutilik, inuk tamatuminnga pisariaqartitsippat, inissatut neqeroorumi immikkut ittumik tapersorsorneqarnissaminut pisinnaatitaavoq.

§ 5. Pisortat illuutaat atortorissaarutaallu sapinngisamik ima aqqissorneqarsimassapput inunnit innarluutilinnit iserfigineqarsinnaallutillu atorineqarsinnaaneri qulakkeerineqassalluni.

§ 6. Inatsisartut inatsisaat manna malillugu meeqqamut innarluutilimmut tapersiinissaq pillugu aalajangiinerit, meeqqamut suna pitsaanerunersoq aallaavigalugu, pisassapput.

Imm. 2. Meeqqamut innarluutilimmut tunngasuni pissutsini tamani meeqqap nammineq isumai pingaartinneqassapput, meeqqap ukiuinut, pisinnaassuseqarneranut perorsimassusianullu peqqissaartumik eqqarsaatiginnittoqassalluni.

Sullinniakkat

§ 7. Inunnut innarluutilinnut Kalaallit Nunaanni najugaqartunut, ukiui apeqqutaatinnagit, Inatsisartut inatsisaat manna atuuppoq.

Imm. 2. Inuit innarluutillit tassaapput inuit timimikkut, tarnimikkut, silassorissutsimikkut imaluunniit malugisaqarsinnaanermikkut sivisuumik piginnaanikillisimasut, aporfii assigiinngitsut sunniivigeqatigiinnerisa kingunerisaannik allat assigalugit inuiaqatigiinni tamakkiisumik sunniuteqarluartumillu peqataanissaminut akornuserneqarsinnaasut.

Imm. 3. Inuit annertuumik innarluutillit tassaapput inuit timimikkut, tarnimikkut, silassorissutsimikkut imaluunniit malugisaqarsinnaanermikkut sivisuumik annertuumillu piginnaanikillisimasut, aporfii assigiinngitsut sunniivigeqatigiinnerisa kingunerisaannik allat assigalugit inuiaqatigiinni tamakkiisumik sunniuteqarluartumillu peqataanissaminut annertuumik akornuserneqartut.

Imm. 4. Inunnut innarluutilinnut qanigisaasunut atuupputtaaq §§ 19, 20 aamma 22 malillugit siunnersuisarneq il.il. pillugu aalajangersakkat, § 33 malillugu meeqqamik innarluutilimmik angerlarsimaffimmi pilersuinermi aningaasartuutaanerusartut, § 42 malillugu nuunnermut ikiorsiisarneq kiisalu §§ 66 aamma 67 malillugit tikeraarluni angalasarneq pillugu aalajangersakkat.

Imm. 5. §§ 49-51-imi kiisalu allaffissornikkut maleruagassat kiisalu najoqqutassiat § 66, imm. 8, aamma § 67, imm. 4, malillugit aalajangersagaasut aammattaq inunnut innarluutilinnut pisortat tapersiinermi iliuuserisaannik Kalaallit Nunaata avataani inissinneqarsimasunut, atuupput.

§ 8. Meeqqat, Inatsisartut inatsisaat manna aammalu Meeqqat tapersersorneqarnissaannut Inatsisartut inatsisaat tunngavigalugit tapersersorneqarnissamik pisinnaatitaasut, Inatsisartut inatsisaat taakku marluk tunngavigalugit pisariaqartitaminnik tapersersorneqassapput. Ataqtigiissaakkamik kiisalu meeqqamut pitsaanerpaasusaaq aallaavigalugu tapersersuineq tunniunneqassaaq.

Imm. 2. Meeqqamut innarluutilimmut tapersersuinerup Inatsisartut inatsisaat manna malillugu aallartinneqartup, suliniuteqarnermut meeqqat tapersersorneqarnissaannut Inatsisartut inatsisaat aammalu inatsisit allat malillugit meeqqamut tassunga aallartinneqartumut, ataqtigiissinneqarnissaa kommunalbestyrelsip isumagissavaa. Meeqqamut immaqalu meeqqap ilaqutaanut imaluunniit meeqqap isumassuisuineq tapersersuineq Inatsisartut inatsisaat manna malillugu aallartinneqartoq, inatsisit allat malillugit ilaqutariinnut suliniutigineqartunut ataqtigiissaarneqarnissaa kommunalbestyrelsittaaq isumagissavaa.

Kapitali 2

Aalajangiisinnaatitaaneq aamma akisussaaffeqarneq

§ 9. Inatsisartut inatsisaat manna malillugu inunnut innarluutilinnut pisariaqartinneqartunik tapersersuisoqartarnissaat, kiisalu inuit innarluutillit pisariaqartitaminnik ikiorserneqarnissaat kommunalbestyrelsip isumagissavaa, taamaattoq takuuk § 10.

Imm. 2. Kapitali 6 malillugu tapersersuisarneq kiisalu kapitali 7 malillugu immikkut ittumik tapersersuisarneq pillugu kommunalbestyrelse aalajangiissaaq, taamaattoq takuuk § 11, imm. 1.

Imm. 3. Inuup innarluutillip § 11, imm. 1 malillugu ulloq unnuarlu neqeroorummiitinneqarnissaa pillugu kommunalbestyrelse Naalakkersuisunut inassuteqassaaq.

§ 10. § 59 naapertorlugu, inunnut innarluutilinnut ulloq unnuarlu neqeroorutini inissat pisariaqartinneqartutut amerlassuseqarnissaat Naalakkersuisut isumagissavaat.

§ 11. Inuk innarluutilik ulloq unnuarlu neqeroorutini inissinnissamik neqeroorfineqassanersoq Naalakkersuisut aalajangissavaat.

Imm. 2. Kommunimi inuup innarluutillip angerlarsimaffigisaani kommunalbestyrelsimit inassuteqarneq malillugu aalajangiisoqassaaq.

Imm. 3. Suut tunngavigalugit inuk ulloq unnuarlu neqeroorummi inissinneqarnissaanik neqeroorfigineqassanersoq, § 46 imm. 1 imaluunniit § 48 imm. 1 naapertorlugit, kiisalu paasissutissat suliamut attuumassuteqartut, ilanngullugu inuup tapersersorneqarnissamut pisariaqartitsinerata naammattumik sukumiissusilimmik nassuiarneqarnera, kommunalbestyrelsip inassuteqaataani allassimassaaq.

Imm. 4. Imm. 3 naapertorlugu kommunalbestyrelsip inassuteqaateqartarnera pillugu maleruagassanik erseqqinnerusunik Naalakkersuisut aalajangersaasinnaapput.

§ 12. Naalakkersuisut qitiusumik inissiinissamut innersuussisarfimmik ingerlatsissapput (Qitiusumik Inissiinissamut innersuussisarfik).

Imm. 2. § 11, imm. 1 naapertorlugu. Inissiinissamut qitiusumi innersuussisarfik inuk innarluutilik ulloq unnuarlu neqeroorummi sorlermi allatsissanersoq aalajangiisassaaq

Kapitali 3 *Nakkutilliineq*

§ 13. Kapitali 9 malillugu inunnut innarluutilinnut inissatut neqeroorummiittunut, inummut tunngatitamik kommunalbestyrelse nakkutilliissaaq. Nakkutilliineq inissatut neqeroorutip nalinginnaasumik ingerlatsineranut nakkutilliinerunngilaq, § 14, imm. 3 naapertorlugu. Nakkutilliinerminut ilaatillugu, inissatut neqeroorummiinnermi inuup timikkut, tarnikkut inooqatigiinnikkullu pisariaqartitai suli naammassineqarnersut kommunalbestyrelsip qulakkiissavaa.

Imm. 2. Imm. 1 malillugu nakkutilliinerminut atatillugu inissatut neqeroorummi pissutsit ernumanartoqartut kommunalbestyrelsip paasippagu, kommunalbestyrelsip nakkutilliinerminik ingerlatsivik nalunaarfigissavaa, § 14, imm. 3 naapertorlugu.

Imm. 3. Naalakkersuisunit qinnuigineqarneq tunngavigalugu, imm. 1-imiit 2 malillugit nakkutilliinerminik kommunalbestyrelsip ingerlatsineranut paasissutissat kissaatigineqartut tamaasa nassiunneqarnissaat, kommunalbestyrelsip pisussaaffigaa.

Imm. 4. Naalakkersuisut inummut tunngatitamik nakkutilliinerminut maleruagassanik erseqqinnerusunik aalajangersaasinnaavoq, ilanngullugit:

- 1) kommunalbestyrelsip nakkutilliisussaataitanerminik ingerlatsinera,
- 2) nakkutilliinerminik aaqquissuussinera,
- 3) nakkutilliisussaataitanerup naammassineqarnissaanut atugassarititaasut piimasaqatillu, aamma
- 4) kommunalbestyrelsip nakkutilliinerminut nalunaarusiamik suliaqartarnera.

§ 14. Naalakkersuisut qitiusumik nakkutilliinerminik ingerlatsivimmik pilersitsissapput (nakkutilliinerminik ingerlatsivik).

Imm. 2. Kommunalbestyrelsip Inatsisartut inatsisaanni matumani maleruagassanik ingerlatsineranik allaffissornikkullu aqutsineranik pingaarnersiulluni nakkutilliinerminik ingerlatsivik nakkutilliissaaq.

Imm. 3 Kapitali 9 malillugu inissatut neqeroorutit ingerlanneqarnerannut sammisumik nakkutilliinermik ingerlatsivik nakkutilliissaaq.

Imm. 4. Nakkutilliinermik ingerlatsiviup imm. 3 malillugu ingerlatsinermut sammisumik nakkutilliinermiut ilaatillugu, inissatut neqeroorummi pissutsit nakkutigissavai aammalu inissatut neqeroorummik oqaloqateqarneq ingerlatissallugu.

Imm. 5. Imm. 2 aamma 3 malillugit nakkutilliineq nalunaaqqaarluni nalunaaqqaarnaniluunniit nakkutilliinertut ingerlanneqarsinnaavoq.

Imm. 6. Naalakkersuisut ingerlatsinermut sammisumik nakkutilliinerup aqqissuunneqarnera aammalu imarisassai pillugit maleruagassanik erseqqinnerusunik aalajangersaassapput.

§ 15. Nakkutilliinermik ingerlatsiviup, § 14, imm. 1 naapertorlugu, pisariaqartumik kinaassutsimut uppernarsaammik takutitsinermigut eqqartuussivimmillu aalajangiivigineqaqqaanngitsumik, paasissutissat kommunip ingerlatsiviata pigisai tamaasa § 14, imm. 2 malillugu nakkutilliinermiut naleqquttuosorisatik takusinnaavaat, tamatumunnga aamma ilaapput paasissutissat inunnuq tunngasut mianerisariaqartut kiisalu suliffiup iluani allattugaatigineqartut.

Imm. 2. Nakkutilliinermik ingerlatsivik allaganngorlugu nakkutilliinermut nalunaarusiamik suliaqassaaq tassanilu § 14, imm. 2 malillugu nakkutilliineq pillugu kommunalbestyrelsimut najoqqutarineqarsinnaasunik piunasaqaateqassalluni. Nakkutilliinermik ingerlatsiviup aammattaaq nakkutilliineq tunngavigalugu kommunalbestyrelsimut pisussaaffiliisumik makkuninnga naalakkiuteqarsinnaapput:

- 1) Inatsisartut inatsisaat manna aallaavigalugu kommunalbestyrelsip § 77 malillugu suliani ingerlanneqartuni sullissinermik qulaajaaneq aallartissagaa, imaluunniit § 79 malillugu iliuusissanut pilersarusiussasoq, taakkulu suliamik suliaqarnermi aallartitsinerit piffissap nakkutilliinermik ingerlatsiviup aalajangiigaata iluani naammassineqarsimasapput. Suliap imaluunniit suliat qanoq ingerlanerat pillugu nakkutilliinermik ingerlatsiviup kommunalbestyrelsip ataavartumik paasissutissiisarnissaa piunasaqaatigisinnaavaat.
- 2) Nakkutilliinermik ingerlatsiviup nakkutilliinermiut atatillugu naliliippat, suliani pineqartuni kommunalbestyrelse Inatsisartut Inatsisaanni matumani aalajangersakkanik malinnissimannngitsaq, kommunalbestyrelse suliamik naammassineqarsimasumik kingumut aallartitseqqissaaq, aamma
- 3) Nakkutilliinermik ingerlatsivimmiit nalilerneqarpat suliami ingerlasumi imaluunniit naammassineqarsimasumi inissatut neqeroorummiinnissaq pisariaqartinneqartoq, tamannali neqeroorutigineqarsimannngitsaq, § 77 malillugu Nakkutilliinermik ingerlatsivimmit piffissaliunneqartup iluani kommunalbestyrelsip qulaajaaneq aallartissavaa.

§ 16. Inissatut neqeroorummit nakkutilliinermut ingerlatsiviup ingerlatsinermut sammititamik nakkutilliinermiut atatillugu paasissutissat pisariaqartinneqartut tunniunneqarnissat Nakkutilliinermik ingerlatsiviup pisinnaatitaaffigaa.

Imm. 2. §§ 56 aamma 61 malillugit nakkutilliinermut ingerlatsivik naalakkiuteqarsinnaavoq inissatut neqeroorutip eqqortitsisimanera inissatut neqeroorutip akuersissummik

tigumminniinnarsinnaananut piumasaqaatinngortinneqarsinnaavoq. Nakkutilliinermik ingerlatsivik naalakkiissutip eqqortinneqarnissaanut piffissaliussinnaavoq.

Imm. 3. Inissatut neqeroorutini ataasiakkaani annertusisamik nakkutilliinissaq pisariaqartoq pissutsit takutippassuk, nakkutilliinermut ingerlatsivik tamanna pillugu aalajangiisnaavoq. Imm. 2 naapertorlugu annertusisamik nakkutilliinissamut aalajangernermt atatilugu nakkutilliinermik ingerlatsivik naalakkiuteqassaaq.

Imm. 4. Nakkutilliinermik ingerlatsiviup paasippagu inissatut neqeroorummi ernumanartoqartoq, taava inunnt innarluutilinnut inissatut neqeroorutini najugaqartunut kommunini kommunalbestyrelse akisussaasuusoq nakkutilliinermik ingerlatsiviup nalunaarfigissavaa.

Imm. 5. Qaqugukkt annertusisamik nakkutilliinermik aallartitsisoqarsinnaanersoq, aammalu qaqugukkt naalakkiisoqarsinnaanersoq pillugu maleruagassat erseqqinnerusut Naalakkersuisut aalajangersassavaat.

Kapitali 4

Nuna Tamakkerlugu Innarluutilinnut Sullissivik

§ 17. Naalakkersuisut nuna tamakkerlugu innarluutilinnut sullissivimmik pilersitsissapput, ilaatigut tassani suliassaassallutik:

- 1) inuit innarluutillit qanigisaasalu Inatsisartut inatsisaat manna pillugu siunnersorneqartarnerat ilitsersorneqartarnerallu, ilanngullugit tapersersuineq pillugu aalajangiinerit naammagittaalliuutigineqartarnissaannut periarfissaqarneq aammalu inatsisinut allanut attuumassuteqarneq,
- 2) kommunalbestyrelsinut Inatsisartut inatsisaat manna pillugu siunnersuineq ilitsersuinerlu, ilanngullugit tapersersuinissanut periarfissat, suliassanik suliarinninneq aammalu inatsisinut allanut attuumassuteqarneq,
- 3) § 43 naapertorlugu, inuup innarluutillip ulluinnarni sapinngisamik pitsaanerpaamik piginnaaneqarnissaa siunertarlugu, inunnt innarluutilinnut allanngutsaaliuilluni sungiusaanissamik neqerooruteqarneq,
- 4) inunnt innarluutilinnut tapersersuinermt pissutsinullu ilisimasat pillugit sullissiviunissaq,
- 5) Innarluuteqarneq aammalu tapersersuinermt periarfissat pillugit kommuninut, inunnt innarluutilinnut taakkualu qanigisaannut pikkorissaasarnissanik neqerooruteqartarneq,
- 6) § 77 naapertorlugu, kommunalbestyrelsimt piumaffigineqarneq malillugu suliani immikkut pisariusuni qulaajaanernik suliaqarneq, aamma
- 7) § 70, imm. 2 aamma § 71, imm. 2 malillugit, kommunalbestyrelsimt piumaffigineqarneq malillugu ulloq unnuarlu neqeroorummiigunnaarnissaq pillugu suliani oqaaseqaateqartarneq,.

Imm. 2. Nuna Tamakkerlugu Innarluutilinnut Sullissivimmik kommunalbestyrelsip atuineranut Naalakkersuisut akigitat pillugit maleruagassanik erseqqinnerusunik aalajangersaasinaapput.

§ 18. Kommunalborgestrelse Nuna Tamakkerlugu Innarluutilinnut Sullissiviup suliami aalajangersimasumi kommunalborgestrelsimt siunnersuineranut ilaatillugu, paasissutissat suliap

suliarineqarneranut pingaaruteqarsimappata, Nuna Tamakkerlugu Innarluutilinnut Sullissivimmut inummut paasissutissanik ingerlatitseqqissinnaavoq, ilanngullugit paasissutissat inunntunngasut mianerisaqartut.

Imm. 2. Kommunalbestyrelsip aatsaat inuk pineqartoq, suliame sammineqartoq, imaluunniit tassunnga angajoqqaatut akisussaataasooq imaluunniit angajoqqaatut sinniisuusoq akuersiteqqaarlugit imm. 1 malillugu inummut paasissutissat ingerlateqqissinnaavai, taamaattoq takuuk imm. 3.

Imm. 3. Akuersinissaq, imm. 2 naapertorlugu, tunniunneqarumangippat, imaluunniit allanik pissuteqartumik akuersissummik piniartoqarsinnaangippat, suliame pisut, ilanngullugu inuup inatsisitigut illersugaanera eqqarsaatigalugu tamanna ersarissumik pisariaqarpat, kommunalbestyrelsip inummut paasissutissat ingerlateqqissinnaavai, ilanngullugit paasissutissat inummut aalajangersimasumut tunngassuteqartut. Ingerlatitseqqilluni tunniussineq inuup soqutigisaannik isumaginninnissaq eqqarsaatigalugu pissasoq, aammalu soqutigisanik mianerinninnissamit isertuussinissamik tunngavilersuutigineqartumit ersarissumik annertunerussasoq piumasaqaataavoq, ilanngullugu inuup paasissutissani pineqartup mianerineqarnissaa.

Kapitali 5

Siunnersuisarneq ilitsersuisarnerlu

§ 19. Kommunalbestyrelse inunntunngasut innarluutilinnut siunnersuisassaaq.

Imm. 2. Imm. 1 malillugu siunnersuineq Inatsisartut inatsisaat manna imaluunniit inatsit alla malillugu tapersersuinerlut atattillugu aqqiisoqarnerani immikkut ittumik tunniunneqarsinnaavoq.

§ 20. Inunntunngasut innarluutilinnut atortunik ikiorsiissutissanik toqqaanissaq kiisalu taakkua atorineqarnissaannik ilitsersuissutit pillugit siunnersuinissamik kommunalbestyrelse neqerooruteqassaaq.

Imm. 2. Imm. 1 malillugu siunnersuinerup isumaginissaanut kommunalbestyrelse Nuna Tamakkerlugu Innarluutilinnut Sullissivimmit ilitsersorneqarnissamik noqqaasinnaavoq.

§ 21. Inunntunngasut innarluutilinnut ulluinaat pitsaanerusumik aquunneqarsinnaanissaat siunertaralugu pikkorissaanerini ilinniartitsinerinilu il.il. inuit innarluutit peqataanissaannik kommunalbestyrelsip neqeroorfigissavai.

Imm. 2. Imm. 1 malillugu pikkorissarnerini imaluunniit ilinniartinneqarnerini peqataanissamut kommunalbestyrelse aningaasatigut tapersiisinnavaoq.

Imm. 3. Pikkorissarnerit ilinniartitsinerinilu pillugit Nuna Tamakkerlugu Innarluutilinnut Sullissivimmit kommunalbestyrelse ilitsersorneqarnissamik noqqaasinnaavoq.

§ 22. Inunntunngasut innarluutilinnut qanigisaasunut kommunalbestyrelse siunnersuissaaq.

Imm. 2. Qanigisaasut tapersersorneqarnissaat inummullu innarluutilimmut ulluinnarni oqilisaanissamut pitsannngorsaanissamullu piginnaasaasa nukittorsarneqarnissaat anguniarlugu, kommunalbestyrelsip inunnut innarluutilinnut qanigisaasut pikkorissarnernut ilinniartitaanernullu peqataanissaannik neqerooruteqarfigissavai.

Imm. 3. Imm. 1 malillugu siunnersuinermit aamma imm. 2 malillugu pikkorissaanernut ilinniartitsinernullu atatillugu, qanigisaasoq Inatsisartut inatsisaat manna malillugu imaluunniit inatsisit allat malillugit tapersersorneqarnissamik pisariaqartitsinersoq kommunalbestyrelsip eqqumaffigissavaa.

Kapitali 6

Inunnut innarluutilinnut tapersersuineq

Aalajangiisinnaatitaaneq

§ 23. Inummullu innarluutilimmut malunnaatilimmik pisariaqartinneqartutut isigineqarpat, aalajangersimasumullu tapersersorneqarsinnaanermut piumasagaatit eqquutinneqarpara, kommunalbestyrelse kapitali manna malillugu tapersersuinissamik aalajangiisinnaavoq.

Imm. 2. Kapitalimi matumani aalajangersakkat malillugit tapersersuinissaq pillugu aalajangiineq, inuup innarluutillip pisariaqartitaanik periarfissaanillu tunngaveqartumik piviusumik immikkullu nalilersuinikkut pissaq. Inuk innarluuteqarnersoq kommunalbestyrelsip nalilersuinermit paasinarsassavaa. Inuup innarluutillip innarluutaa aallaavigalugu, kommunalbestyrelsip nalilersuinermini nalilissavaa inuup innarluutillip tapersersorneqarnissaminik pisariaqartitaata annertussusissaa suussusissaalu. Nalilersuineq pisariaqartinneqartumit annertunerussanngilaq aammalu inuk innarluutilik suleqatigalugu pissalluni. Inuup innarluutillip nammineq aalajangiisinnaanera, pisariaqartitai pisinnaasaalu ataqqillugit nalilersuineq ingerlanneqassaaq.

Imm. 3. § 74, imm. 1 aamma 3, imaluunniit § 75, imm. 1 aamma 3 naapertorlugit, tapersersuinissaq pillugu aalajangiinissaq sioqqullugu, inuk innarluutilik taassumunngalu angajoqqaatut sinniisuusoq imaluunniit angajoqqaatut akisussaataasoq kiisalu qanigisaasut kommunalbestyrelsip oqaloqatigisimassavai.

Imm. 4. Tapersersuinissaq pillugu neqerooruteqarneq pillugu aalajangiineq tunngavilersuummik ilaqartinneqassaaq, tassani tapersersuinermit tunngaviusoq siunertaasorlu nassuiarneqassalluni, kiisalu naammagittaalliornissamut ilitsersuutitaqarsinnaalluni.

Imm. 5. Kapitali manna malillugu tapersersuinissamik aalajangiisoqarpat, tapersersuinermit siunertaasut suli naammassineqarnersut, kommunalbestyrelsip ingerlaavartumik malinnaaffigissavaa. Malinnaaneq sapinngisamik inuk innarluutilik suleqatigalugu pissaq.

Inuttut ikiorserneqartarneq isumassuisarnerlu

§ 24. Kommunalborgstyrelsip pissutsit tamanna ajornartinnigippassuk inummullu innarluutilimmut neqeroorutigissavaa:

- 1) inuttut ikiorserneqarnissaq,
- 2) angerlarsimaffimmi suliassanut pisariaqartunut ikiorneqarnissaq, kiisalu
- 3) nerisassaqaarnikkut sullinneqarneq.

Imm. 2. Inuup innarluuteqarnini pissutigalugu pineqartunik nammineerluni sularinnissinnaangitsumut, imm. 1 malillugu tapersiineq neqeroorutigineqassaaq.

Atortorissaarutit ikiuutaasussat

§ 25. Inummut innarluutilimmut atortorissaarutitik ikiuutaasussanik pissarsinissamut kommunalbestyrelse tapersiissaaq, atortorissaarut ikiuutaasussaq:

- 1) annertuumik inuup innarluutaata kingunerisaanut ikiuutaasinnaappat,
- 2) annertuumik inuup innarluutillip ulluinnarni inuuneranut oqilisaasinnaappat imaluunniit
- 3) inuup innarluutillip inuussutissarsiummik ingerlatsinissaanut pisariaqarpat.

Imm. 2. Atortorissaarutit ikiuutaasussasut aningaasartuutit taamaallaat tapersiisoqarsinnaavoq inuup innarluuteqanngitsup nalinginnaasumik imminut illumilu atugassanik pisiarisartagaaniit annertunerujussuarmik akisunerusunut.

Imm. 3. § 23 imm. 2 malillugu atortorissaarummik ikiuutaasussamik tapersiissuteqarnissamik akuerseqqinnermi kommunalbestyrelse aalajangersimasumik inummullu innarluutilimmut tunngasumik nalilersueqqinnissamik sularinngitsuuisinnaavoq. Tamatumunnga taarsiullugu inuk innarluutilik, inuup innarluutaata annertuumik allanngorsimannginnera pillugu, kommunalbestyrelsimut ilumoortumik uppernartumillu uppernarsaalluni nalunaaruteqarsinnaavoq.

Imm. 4. Naalakkersuisut inummut innarluutilimmut atortorissaarummik ikiuutaasussamik pissarsinissamut tapersiisarnermut tunngasunik maleruagassanik erseqqinnerusunik aalajangersaasinnaapput.

§ 26. Atortorissaarutit ikiuutaasussap, § 25 malillugu akuerineqarsimasup, atorsinnaanissaanut iluorsaannissaa imaluunniit aserfallatsaalinissaa pisariaqarpat, iluorsaanneranut aserfallatsaalineranullu aningaasartuutit kommunalbestyrelsimut matussusissavai.

Imm. 2. Imm. 1 malillugu suliassanik suliaqartoqartillugu atortorissaarutit ikiuutaasussap taarsernissaa imminut akilersinnaanerunersoq, pisuni ataasiakkaani tamani kommunalbestyrelsimut nalilersortassavaa.

Ingiallorteqarneq

§ 27. Inuk innarluutilik innarluuteqarnini pissutigalugu kisimiilluni angalaarsinnaangippat qaammammut nalunaaquttap akunneri 15-it tikillugit amerlassusilinni ingiallorteqarnissaa kommunalbestyrelsimut neqeroorutigissavaa.

Imm. 2. Inuup, imm. 1 malillugu ingiaqateqarsinnaatitaasup, inuk suliassamik sularinnittussaq nammineerluni toqqarsinnaavaa. Kommunalbestyrelsimut inuk toqqarneqartoq akuerissavaa atorfinitsissallugulu.

Imm. 3. Imm. 1 malillugu pisut saniatigut, sulinngiffeqarnermi angalanissaq ingiallorteqarani piviusunnngortinneqarsinnaanngippat, sulinngiffeqarnermi angalanissap piviusunnngortinneqarnissaa siunertaralugu, ingiallorteqarnissaq inummut innarluutilimmut kommunalbestyrelsip neqeroorutigisinnaavaa.

Imm. 4. Naalakkersuisut inunnut innarluutilinnut ingiallorteqartitsineq pillugu maleruagassanik erseqqinnerusunik aalajangersaassapput, matuma ataani piumasaqaateqartoqassaaq, kommunalbestyrelse pinerluuteqarsimannginnermik aamma meeqqanik pinerliisimannginnermik uppernarsaammik piumasaqarnissamat ingiallortaasussap atorfinitsinnginnerani.

Inigisap aaqqissuunnera

§ 28. Inuup innarluutillip inigisaata immikkut aaqqissuunnissaanut kommunalbestyrelse tapersiisinnaavoq,

- 1) inigisap pineqartumut angerlarsimaffigissallugu naleqqunnerulersinnissaanut tamanna pisariaqarpat,
- 2) inuk innarluutilik aaqqissuussinerup kingunerisaanik inigisamini nammineersinnaanerulissappat, aamma
- 3) inuk innarluutilik nammineq angerlarsimaffimmini najugaqarpat, uuma ataaniillutik najugaqaqatigiiffinni imaluunniit najugaqarfinni illersugaasuni najugaqarneq.

Imm. 2. Imm. 1 malillugu taamaallaat tapersiivigineqarsinnaapput aningaasartuutit, inuup innarluuteqanngitsup nalinginnaasumik inigisaminik aaqqissuussinerminut atortagaanit annertuumik annertunerussut.

Imm. 3. Naalakkersuisut inissiat inunnut innarluutilinnut immikkut aaqqissuunnissaanut tapersiisarneq pillugu maleruagassanik erseqqinnerusunik aalajangersaasinnaapput.

Qamutit motorillit

§ 29. Inuk innarluutilik, tamanik angallassivinnik atuiffiunngitsumi najugaqarsimappat imaluunniit ulluinnarni angalaartarpat, uuma ataani taxat aamma pineqarlutik, kommunalbestyrelse qamutininik motorilinnik pisaarnissamat tapersiissaaq, taamaattoq biilinuunngitsumik.

Imm. 2. Imm. 1 malillugu inunnut ataavartumik innarluutilinnut kommunalbestyrelse taamaallaat tapersiissaaq.

Imm. 3. Qamutit motorillit imm. 1 malillugu pisiarinissaannut tapersiivigineqarsimasut ingerlanneqarnerannut aningaasartuutit matussusernissaannut kommunalbestyrelse tapersiissaaq.

Imm. 4. Naalakkersuisut qamutininik motorilinnik pisaarnissamat tapersiisarneq pillugu maleruagassanik erseqqinnerusunik aalajangersaasinnaapput, matuma ataani ingerlanneqarnerannut aningaasartuutininik killiliineq qanoq paasineqartarnersoq aamma ingerlanneqarnerannut aningaasartuutit amerlassusissaannut killiliineq.

§ 30. Inuup innarluutillip qamutit allanngortinneqanngippata atorsinnaanngippagit, qamutitut motoorilinnut, ilanngullugit biilinnut, immikkut aaqqissuussinissamut kommunalbestyrelse tapersiissaaq.

Imm. 2. Imm. 1 malillugu inunnut ataavartumik innarluutilinnut kommunalbestyrelse taamaallaat tapersiissaaq.

Imm. 3. Naalakkersuisut qamutit motorillit immikkut aaqqissuunnissaannut tapersiisarneq pillugu maleruagassanik erseqqinnerusunik aalajangersaasinnaapput.

§ 31. Inuk innarluutilik ataatsimoorussamik angallassinermik aaqqissuussami angallanneqarnissamik kommunalbestyrelsip neqeroorfigisinnaavaa.

Imm. 2. Ataatsimoorussamik angallassinermik aaqqissuussamut qamutitik motorilinnik kommunalbestyrelse atugassiinnaavoq. Aaqqissuussineq peqqinnissaqarfik imaluunniit suliffeqarfik namminersortoq suleqatigalugu pilersinneqarsinnaavoq.

Aningaasartuutaanerusut

§ 32. Inummut innarluutilimmut aningaasartuutaanerusut annertuut matussusernissaannut kommunalbestyrelse aningaasanik tapersiissaaq.

Imm. 2. Innarluuteqarnerup malitsigisaanik aningaasartuutaanerusut, aammalu inatsisit allat malillugit imaluunniit Inatsisartut inatsisaanni matumani aalajangersakkat allat malillugit matussuserneqarsinnaanngitsut, taamaallaat matussuserneqarnissaannut tapersiisoqarsinnaavoq.

Imm. 3. Inummut innarluutilimmut aningaasartuutaanerusut annertuut matussutissaannik tapersiivigineqartarnerat pillugu maleruagassanik erseqqinnerusunik Naalakkersuisut aalajangersaasinnaapput.

§ 33. Meeqqap angerlarsimaffimmi pilersorneqarnerani aningaasartuutaanerusut annertuut matussusernissaannut kommunalbestyrelse aningaasanik tapersiissaaq.

Imm. 2. Meeqqap innarluuteqarnerata malitsigisaanik aningaasartuutaanerusut, kiisalu inatsisit allat malillugit imaluunniit Inatsisartut inatsisaanni matumani aalajangersakkat allat malillugit matussuserneqarsinnaanngitsut, taamaallaat matussuserneqarnissaannut tapersiisoqarsinnaavoq.

Imm. 3. Naalakkersuisut meeqqamik angerlarsimaffimmi pilersuinermi aningaasartuutaanerusut annertuut matussutissaannik tapersiisarneq pillugu maleruagassanik erseqqinnerusunik aalajangersaasinnaapput.

Nammineq angerlarsimaffimmi isumassorneqarnerup isumaginissaanut tapersiisarneq

§ 34. Inummut, inuup innarluutillip nammineq angerlarsimaffimmini najugaqartup ulluinnarnik isumassorneqarneranik isumaginnittumut, kommunalbestyrelse aningaasanik tapersiissaaq.

Imm. 2. Imm. 1 malillugu tapersiineq, kommunalbestyrelsip inuummik isumassuisumik atorfinitsitsineratigut pissaaq. Inuup innarluutillip pisariaqartitsinera tunngavigalugu sapaatip akunneranut nalunaaquttap akunnerisa atorfinitsitsiviusussat amerlassusissai, kommunalbestyrelsip

aalajangersassavai. SIK-mut isumaqatigiissutit malillugit sulisumut ilinniagaqarsimannngitsumut akigitat minnerpaaffii sukkulluunniit atuuttut malillugit aningaasarsiaqartitsineq pissaaq.

Imm. 3. Inunnik inoqutigiinni ilaangitsunik atorfinitsitsisoqartussaattillugu pineqaatissinneqarsimanninnermut uppersarsaat aammalu naleqqutsillugu meeqqanik pinerliisimanninnermut uppersarsaat piniarneqassapput.

Oqilisaassineq

§ 35. Ulluinnarni isumassuineq angajoqqaanit imaluunniit qanigisanit allanit nammineq angerlarsimaffimmi imaluunniit angajoqqaarsianit isumagineqarpat, kommunalbestyrelsi inummut innarluutilimmut oqilisaassinissamik neqerooruteqassaaq.

Imm. 2. Imm. 1 malillugu oqilisaassineq aatsaat neqeroorutigineqarsinnaavoq,

- 1) isumassuinermi suliaasaq, angajoqqaanut imaluunniit qanigisaasunut allanut isumassuinermik isumaginnittunut annertuumik suliaqarnerunermik malitseqartarpat, aamma
- 2) angajoqqaat qanigisaasut allat ilaqutariit paarsisartut isumassuinermik isumaginniinnarsinnaanissaannut oqilisaassinissaq pisariaqarpat.

Imm. 3. Imm. 1 aamma 2 malillugit oqilisaassineq kapitali 9 naapertorlugu inissatut neqeroorummiititsinikkut pisinnaavoq. Meeqqanut 18-it inorlugit ukiulinnut aamma meeqqat tapersorsorneqarnissaannut Inatsisartut inatsisaat naapertorlugu kommunip aaqquissuineratigut ilaqutariinni paarsisartuni oqilisaassineq pisinnaavoq.

Imm. 4. Naalackersuisut inuup innarluutillip ulluinnarni isumassorneqarnera angajoqqaanit imaluunniit qanigisanit allanit nammineq angerlarsimaffimmi imaluunniit ilaqutariinnit paarsisartunit isumagineqarpat, oqilisaassineq pillugu maleruagassanik erseqqinnerusunik aalajangersaasinnaapput.

Suliffissanik sammisassanillu neqeroorutit

§ 36. Inummut innarluutilimmut 18-it sinnerlugit ukiulimmut, innarluuteqarnini pissutigalugu suliffeqarfeqarfimmi atugassarititaasut nalinginnaasut tunngavigalugit suliffeqalersinnaangitsumut, aammalu inatsisit allat malillugit neqeroorutinik atuisinnaangitsumut illersugaasumik suliffeqartitsinissamik Kommunalbestyrelse neqerooruteqassaaq, taamaattoq takuuk § 47.

Imm. 2. Kommunalbestyrelse sannavinnik illersugaasunik aamma suliffissanik illersugaasunik, imm. 1 malillugu illersugaasumik sulinerup ingerlanneqarfissaannik, pilersitsisinnaavoq ingerlatsisinnaallunilu.

Imm. 3. § 59 naapertorlugu ulloq unnuarlu neqeroorummut atatillugu, imm. 1 malillugu illersugaasumik sannavimmi imaluunniit illersugaasumik suliffeqarfimmi illersugaasumik suliffeqartitsinissaq kommunalbestyrelsip Naalackersuisunut imaluunniit ulloq unnuarlu neqeroorummut isumaqatigiissuteqarneratigut pisinnaavoq.

Imm. 4. Inummut innarluutilimmut imm. 1 malillugu illersugaasumik suliffeqartinneqartumut, suliffeqartitsinermut aningaasarsiarititassaq Naalakkersuisunit aalajangersarneqartoq, kommunalbestyrelsip tunniutissavaa.

Imm. 5. Inummut innarluutilimmut 18-it sinnerlugit ukiulimmut, innarluuteqarnini pissutigalugu suliffeqarfeqarfimmi atugassarititaasut nalinginnaasut tunngavigalugit suliffeqalersinnaanngitsumut imaluunniit suliffeqaannarsinnaanngitsumut, aammalu inatsisit allat malillugit neqeroorummik atuisinnaanngitsumut illersugaasumik suliffeqartitsisarneq pillugu maleruagassanik erseqqinnerusunik Naalakkersuisut aalajangersaasinnaapput.

§ 37. Inummut innarluutilimmut inuttut pikkoriffiit, inuunermi atukkat aamma inuunerup naleqarnerata attatiinnarnissaannut imaluunniit pitsanngorsarnissaannut, sammisassatut aamma katerisimaaqateqarnissamut neqeroorutitik kommunalbestyrelse neqerooruteqassaaq, taamaattoq takuuk § 47, imm. 1.

Imm. 2. Ulluklut ornittakkanik aamma sannavinnik illersugaasunik, imm. 1 malillugu sammisassatut aamma katerisimaaqateqarnissamut neqeroorutit ingerlanneqarfissaannik, kommunalbestyrelse pilersitsisinnaavoq ingerlatsisinnaallunilu.

Imm. 3. § 59 naapertorlugu ulloq unnuarlu neqeroorummumut atatillugu, imm. 1 malillugu sammisassatut imaluunniit katerisimaaqateqarnissamik neqerooruteqarneq ulluklut ornittakkami imaluunniit illersugaasumik suliffeqarfimmi pisinnaasoq kommunalbestyrelsip Naalakkersuisunit imaluunniit ulloq unnuarlu neqeroorummumut isumaqatigiissuteqarneratigut pisinnaavoq.

Imm. 4. Naalakkersuisut inummut innarluutilimmut inuttut pikkoriffiit, inuunermi atukkat aamma inuunerup naleqarnerata attatiinnarnissaannut imaluunniit pitsanngorsarnissaannut, sammisassatut aamma katerisimaaqateqarnissamut neqeroorutit pillugit maleruagassanik erseqqinnerusunik aalajangersaasinnaapput, ilanngullugu sammisassaqartitsinermut atatillugu inummut inummut aningaasarsiaritinneqarsinnaasut.

Kapitali 7

Inunnut annertuumik innarluutilinnut immikkut tapersersuineq

Aalajangiisinnaatitaaneq

§ 38. §§ 39-45-imi kiisalu §§ 49-51-imi maleruagassat malillugit kommunalbestyrelse inummut annertuumik innarluutilimmut tapersiissalluni aalajangiisinnaavoq, imaluunniit §§ 46 aamma 48 najoqqutaralugit ulloq unnuarlu neqeroorummi inissiinissamut innersuusummik suliaqassaaq, inuup annertuumik innarluutillip pisariaqartitaanut pingaaruteqarluinnartutut isigineqarpat, §§ 39-51- imilu allassimasuni immikkut ittumik tapersiinissamut piumasaqaatit naammassineqarsimappata.

Imm. 2. Kapitali manna malillugu immikkut ittumik tapersiinissaq pillugu aalajangiisoqannginnerani imaluunniit inassuteqaammik suliaqannginnermi kommunalbestyrelse:

- 1) § 77 naapertorlugu qulaajaanermik suliaqassaaq,
- 2) §§ 74 aamma 75 naapertorlugit, inummut taassumunnga angajoqqaatut sinniisusooq imaluunniit angajoqqaatut akisussaasooq kiisalu qanigisai minnerpaamik ataasiarluni oqaloqatigissavai, aamma
- 3) § 79 naapertorlugu iliuusissanut pilersaarummik suliaqassalluni.

Imm. 3. Immikkut ittumik tapersersuinissaq nukinginnartumik pisariaqartinneqartillugu, § 77 malillugu qulaajaanerup suliarineqarsimannginnera aammalu § 79 malillugu iliuusissanut pilersaarutip suliarineqarsimannginneri, imaluunniit taakkua inaarsarneqarsimannginnerat apeqqutaatinnagu, kommunalbestyrelse immikkut ittumik tapersiinnissaq pillugu aalajangiisinnaavoq aammalu immikkut ittumik tapersiinnissaq aallartissinnaallugu. Kommunalbestyrelsip tamatuma kingorna sapinngisamik piaarnerpaamik § 77 naapertorlugu qulaajaaneq, aamma § 79 naapertorlugu iliuusissanut pilersaarut suliarissavaa aammalu taakkua tunngavigalugit pisariaqarpat nutaamik aalajangiissalluni.

Imm. 4. Immikkut ittumik tapersiinnissamik aalajangiineq, immikkut ittumik tapersiinnissamik tunualiaqutaasumik siunertaasumillu allaaserinninnermik kiisalu naammagittaalliorsinnaanermut ilitsersuutaasinnaasumik, ilaqartinneqassaaq.

Imm. 5. Kapitali manna malillugu immikkut ittumik tapersiisoqarsimatillugu, immikkut ittumik tapersiisimanerup siunertaanik naammassinnittoqarnerisooq kommunalbestyrelsip ataavartumik malinnaavigissavaa. Malinnaaneq sapinngisamik inuk innarluutilik taassumunngalu angajoqqaatut akisussaataasut imaluunniit angajoqqaatut sinniisusut suleqatigalugit ingerlanneqassaaq.

Meeqqanut annertuumik innarluutilinnut immikkut ulluklut aamma klubbimi neqeroorutit

§ 39. Meeraq innarluuteqarnini pissutigalugu, ulluklut neqeroorummi naammassineqarsinnaanngitsumik tapersersorneqarnissamik isumassorneqarnissamillu immikkut ittumik pisariaqartitsippat, meeqqap annertuumik innarluutillip atualersimanngitsutut ukioqartup immikkut ittumik ulluklut neqeroorummi tiguneqarnissaanik kommunalbestyrelse neqerooruteqassaaq.

Imm. 2. Immikkut ittumik ulluklut neqeroorummik kommunalbestyrelse pilersitsisinnaavoq ingerlatsisinnaallunilu.

Imm. 3. Naalakkersuisut immikkut ittumik ulluklut neqeroorutit pillugit maleruagassanik erseqqinnerusunik aalajangersaasinnaapput, matuma ataani aningaasalersorneqarneri aammalu angajoqqaat akiliutissaat.

§ 40. Meeraq innarluuteqarnini pissutigalugu tapersersorneqarnissamik isumassorneqarnissamillu immikkut ittumik pisariaqartitsippat, meeqqap annertuumik innarluutillip imikkut ittumik klubbimi neqeroorummi tiguneqarnissaanik kommunalbestyrelse neqerooruteqarsinnaavoq.

Imm. 2. Kommunalbestyrelse immikkut ittumik klubbimi neqeroorummik pilersitsisinnaavoq ingerlatsisinnaallunilu.

Imm. 3. Naalakkersuisut immikkut ittumik klubbimi neqerooruteqartarneq pillugu maleruagassanik erseqqinnerusunik aalajangersaasinnaapput.

Inuk tapersersortaasartoq

§ 41. Inummut annertuumik innarluutilimmut, nammineq angerlarsimaffimmini nammineersinnaanissamut isumaginnikkut perorsaasumit tapersersorneqarnissamik pisariaqartitsisumut, inummik tapersersortaasussamik kommunalbestyrelse neqerooruteqassaaq.

Imm. 2. Inuk innarluutilik, taassuma tarnikkut, timikkut inooqatigiinnikkullu ineriartorneranut kiisalu ulluinnarni pisassaminik nammineerluni naammassinnissinnaanissanut inuup tapersersortaasup tapersersussavaa.

Imm. 3. Imm. 1 malillugu aalajangiinnermut ilaatillugu sapaatip akunneranut nalunaaquttap akunnerisa tapersersuinnermut atorneqartussat amerlassusissaat kommunalbestyrelsip aalajangersassavai.

Imm. 4. Kommunalborgstyrelsimut inuk tapersersortaasooq toqqarneqassaaq aammalu taamatut suliaqarnissamut piumasagaatinik naammassinnissalluni.

Imm. 5. Naalakkersuisut inuit tapersersortaasut pillugit maleruagassanik erseqqinnerusunik aalajangersaasinnaapput,

- 1) ilanngullugit meeqqanik pinerliisimanginnermut uppersaammik aamma pineqaatissinneqarsimanginnermut uppersaatiniq piniartarneq,
- 2) piukkunnassutsinut piginnaasaqarfinnullu piumasagaatit, kiisalu
- 3) akissarsianut atorfininnermullu tunngasut.

Nuunnissamut ikiorserneqartarneq

§ 42. Meeqqamut annertuumik innarluutilimmut angajoqqaatut akisussaassusilinnut, kommunip iluani najukkap nuunneqarnerani aningaasartuutiniq matussutissanik, kommunalborgstyrelse aningaasanik tapersiinnissamik neqerooruteqarsinnaavoq, pisuni makkunani:

- 1) ilaqutariit maannakkut najugaanni meeqqap tapersersorneqarnissamut isumassorneqarnissamullu pisariaqartitai naammassineqarsinnaanngippata imaluunniit ajornakusooruteqarluni aatsaat naammassineqarsinnaappata,
- 2) Inatsisartut inatsisaat manna malillugu tapersersorneqarnissamut meeqqap pisariaqartitai, siunissami najugariligassatut kissaatigineqartumi pitsaanagerusumik naammassineqarsinnaappata, aamma
- 3) angajoqqaatut akisussaasut nammineerlutik nuunnissaq kissaatigalugu erseqqissumik oqaatigippassuk.

Nuna tamakkerlugu innarluutilinnut sullissivimmi allanngutsaaliuilluni sungiusaasarneq

§ 43. Inuup piginnaaneqarnerminik attassiinnarnissaanut tamanna annertuumik pingaaruteqartoq isumaqartoqarpat, kommunalborgstyrelse Nuna Tamakkerlugu Innarluutilinnut Sullissivimmi inuup annertuumik innarluutilip allanngutsaaliuilluni sungiusarnissaanik neqerooruteqarnissaq pillugu aalajangiisinnaavoq.

Imm. 2. Nuna Tamakkerlugu Innarluutilinnut Sullissivimmit tassaniinnissamut akuersissut pigineqarpat, aatsaat kommunalbestyrelse imm. 1 malillugu aalajangiisinaavoq. Nuna Tamakkerlugu Innarluutilinnut Sullissivik kommunalbestyrelsimit inassuteqaat tunngavigalugu akuersissuteqarnissaq pillugu aalajangiisaaq.

Imm. 3. Imm. 1 naapertorlugu naleqquttutut isigineqarpat, aammalu tamatumunnga Nuna tamakkerlugu innarluutilinnut sullissivimmit akuersissut pigineqarpat, allanngutsaaliuilluni sungiusarneq, piffissami killiligaasumi Nuna Tamakkerlugu Innarluutilinnut Sullissivimmiinnerup ilaatut akuerineqassasoq kommunalbestyrelse aalajangiisinaavoq.

Imm. 4. Naalakkersuisut Nuna Tamakkerlugu Innarluutilinnut Sullissivimmiinnermut atuinernullu akigititanik ukiumut ataasiarlutik aalajangersaasassapput tamanullu saqqummiussisassallutik.

najugaqaqatigiiffit

§ 44. § 54 naapertorlugu inummut annertuumik innarluutilimmut inuiaqatigiinnut qanittumiittumi najugaqaqatigiiffimmi najugaqarnissamik Kommunalbestyrelse neqerooruteqassaaq, ima pisoqartillugu:

- 1) inuk innarluutilik 18-it sinnerlugit ukioqarpat,
- 2) inuup innarluuteqarnini pissutigalugu ulluinnarni tapersorsorneqarnissaq pisariaqartippagu,
- 3) inuk innarluuteqarnini pissutigalugu nammineq angerlarsimaffimmini najugaqarsinnaanngippat,
- 4) inuk innarluutilik nammineersinnaappat, perorsaaniikkut suliasatigullu ikiorneqarnissaq taamaallaat ulluunerani nalunaaquttap akunnerini pisariaqarluni, aamma
- 5) inuup innarluutillip pisariaqartitai najugaqaqatigiiffimmi najugaqarnerani naammassineqarsinnaappata.

Imm. 2. § 54 naapertorlugu, Kommunalbestyrelsip inuup tapersorsorneqarnissamik pisariaqartitsinera imm. 1 malillugu nunaqqataasunut qanittumi najugaqaqatigiiffimmiinnermi naammassineqarsinnaanngippat, inuk annertuumik innarluutilik najugaqaqatigiiffimmi, kommunimi allami inissisimasumi najugaqarnissamik neqeroorfigisinaavaa. Imm. 1, nr. 1-5-imi piumasagaatit naammassineqarsimassapput.

Imm. 3. Najugaqaqatigiiffimmi kommuni allami inissisimasumi imm. 2 malillugu inuup inissamik neqeroorfigineqarnissaanut tunngavissaritinneqarput:

- 1) inuk imaluunniit taassuma nakkutiginnittua akuersisimassasoq, aamma
- 2) inissap neqeroorutigineqarnissaa sioqqullugu, inuup kommunip angerlarsimaffiata aamma kommunimi najugaqaqatigiiffiup aalajangersimasup taassuma inissisimaffigisaani kommunalbestyrelsip akornanni isumaqatigiissuteqartoqarsimassasoq.

Najugaqarfik illersugaasooq

§ 45. § 55 naapertorlugu inummut annertuumik innarluutilimmut inuiaqatigiinnut qanittumiittumi najugaqarfimmi illersugaasumi najugaqarnissamik kommunalbestyrelse neqerooruteqassaaq, ima pisoqartillugu

- 1) inuk innarluutilik 18-it sinnerlugit ukioqarpat,

- 2) inuup innarluuteqarnini pissutigalugu ulluinnarni tapersorsorneqarnissaq pisariaqartippagu,
- 3) inuk innarluuteqarnini pissutigalugu nammineq angerlarsimaffimmini najugaqarsinnaanngippat,
- 4) inuk innarluutilik najugaqaratigiiffimmi neqeroorutigineqarsinnaasut saniatigut, tapersorsorneqarnissamik pisariaqartitsippat, ilanngullugu ulloq unnuarlu tamaat tapersorsorneqarnissamik pisariaqartitsineq, aamma
- 5) inuup innarluutillip pisariaqartitai najugaqarfimmi illersugaasumi najugaqarnermi naammassineqarsinnaappata.

Imm. 2. § 55 naapertorlugu, Kommunalbestyrelsip inuup tapersorsorneqarnissamik pisariaqartitsinera imm. 1 malillugu nunaqqataasunut qanittumi najugaqaratigiiffimmiinnermi naammassineqarsinnaanngippat, inuk annertuumik innarluutilik najugaqarfimmi illersugaasumi, , kommunimi allami inissisimasumi najugaqarnissamik neqeroorfigisinnaavaa. Imm. 1, nr. 1-5-imi piumasagaatit naammassineqarsimassapput.

Imm. 3. Najugaqarfimmi illersugaasumi kommuni allami inissisimasumi imm. 2 malillugu inuup inissamik neqeroorfigineqarnissaanut tunngavissaritinneqarput:

- 1) inuk imaluunniit taassuma nakkutiginittua akuersisimassasoq, aamma
- 2) inissap neqeroorutigineqarnissaa sioqqullugu, inuup kommunip angerlarsimaffiata aamma kommunimi najugaqarfiup illersugaasup aalajangersimasup taassuma inissisimaffigisaani kommunalbestyrelsip akornanni isumaqatigiissuteqartoqarsimassasoq.

Inunnut innarluutilinnut 18-it sinnerlugit ukiulinnut ulloq unnuarlu neqeroorummi inissiineq

§ 46. § 59 naapertorlugu inummut annertuumik innarluutilimmut tunngatillugu, ulloq unnuarlu neqeroorummiinnissamut kommunalbestyrelse inassuteqaateqassaaq, ima pisoqartillugu:

- 1) inuk innarluutilik 18-it sinnerlugit ukioqarpat,
- 2) inuup innarluuteqarnini pissutigalugu ulluinnarni tapersorsorneqarnissaq pisariaqartippagu,
- 3) inuk innarluuteqarnini pissutigalugu nammineq angerlarsimaffimmini najugaqarsinnaanngippat,
- 4) inuk innarluutilik najugaqarfimmi illersugaasumi neqeroorutigineqarsinnaasut saniatigut tapersorsorneqarnissamik pisariaqartitsippat, kiisalu immikkuullarissumik tapersorsorneqarnissamik pisariaqartitsippat, aamma
- 5) inuup innarluutillip pisariaqartitai ulloq unnuarlu neqeroorummiinnermi naammassineqarsinnaappata.

Imm. 2. Imm. 1 malillugu kommunalbestyrelsip inassuteqarnera tunngavigalugu Naalackersuisut ulloq unnuarlu neqeroorummiinnissamik neqerooruteqarnissaq pillugu aalajangiissapput.

Imm. 3. I imm. 1 naapertorlugu inuk ulloq unnuarlu neqeroorummiittoq pisortanit pilersorneqarnissamut ikiorsiissutinik tigusaqartanngikkuni, aningaasanik kaasarfimmiussanik atisassarsiutissanillu pisinnaatitaavoq.

Imm. 4. Naalackersuisut aningaasat kaasarfimmiussat atisassarsiutissallu pillugit maleruagassanik ersarinnerusunik aalajangersaassapput.

§ 47. § 46 naapertorlugu inuit annertuumik innarluutillit ulloq unnuarlu neqeroorummi najugaqartut illersugaasumik suliffeqartinnissaannut aamma sammisaqartinnissaannut,- kiisalu katerisimaaqateqartinnissaannut Naalakkersuisut neqerooruteqassapput.

Imm. 2. Sannavinnik illersugaasunik, suliffissanik illersugaasunik aamma ulluunerani ornittagassanik, imm. 1 malillugu illersugaasumik suliffisaqartitsinissamik aamma sammisasaqartitsinissamik katerisimaaqatigiinnissamullu neqeroorutininik ingerlatsiviusinnaasumik, Naalakkersuisut pilersitsisinnaapput ingerlatsisinnaallutillu.

Imm. 3. §§ 36 aamma 37 naapertorlugit illersugaasumik suliffisaqartitsinissamik aamma sammisasaqartitsinissamik katerisimaaqatigiinnissamullu neqeroorutit, sannavimmi illersugaasumi, suliffimmi illersugaasumi aamma ulluunerani ornittakkami kommunalbestyrelsip ingerlataanni, ingerlanneqarsinnaanerit pillugu Naalakkersuisut kommunalbestyrelsimut isumaqatigiissuteqarsinnaapput.

Imm. 4. Imm. 1 malillugu inunnut innarluutilinnut illersugaasumik suliffeqartinneqartunut suliffeqarnermi aningaasarsiaasat Naalakkersuisunit aalajangersarneqartut, Naalakkersuisut tunniutissavaat.

Imm. 5. Imm. 3 naapertorlugu illersugaasumik suliffisaqartinneqarnermut aammalu sammisassanut katerisimaaqateqarnissamullu neqeroorutininut akigititassanik ukiumut ataasiarlutik Naalakkersuisut aalajangersaasassapput tamanullu saqqummiussisassallutik.

Meeqqanut innarluutilinnut ulloq unnuarlu neqeroorummi inissiineq

§ 48. § 59 naapertorlugu meeqqamut innarluutilimmut meeqqanut innarluutilinnut ulloq unnuarlu neqeroorummi inissiinissamik kommunalbestyrelse inassuteqassaaq, ima pisoqartillugu: 1) meeraq, angerlarsimaffimmi tunniunneqarsinnaanngitsunik, ulluinnarni inuunissaminut immikkuullarissumik tapersorsorneqarnissamik imaluunniit isumassorneqarnissamik annertuumik pisariaqartitsippat, matuma ataani Inatsisartut inatsisaat manna inatsisilluunniit allat malillugit tapersiisoqaraluarpalluunniit, 2) meeqqap pisariaqartitai ulloq unnuarlu neqeroorummiinnermi naammassineqarsinnaappata, aamma 3) angajoqqaatut akisussaasoq akuersippat.

Imm. 2. § 11, imm. 1 naapertorlugu imm. 1 malillugu kommunalbestyrelsip inassuteqarnera tungavigalugu ulloq unnuarlu neqeroorummiinnissaq pillugu Naalakkersuisut aalajangiissapput.

Imm. 3. imm. 1 naapertorlugu meeraq ulloq unnuarlu neqeroorummiittoq, aningaasanik kaasarfimmiussanik atisassarsiuutissanillu pisinnaatitaavoq.

Imm. 4. Naalakkersuisut aningaasat kaasarfimmiussat atisassarsiuutissallu pillugit maleruagassanik ersarinnerusunik aalajangersaassapput.

Kalaallit Nunaata avataani ulloq unnuarlu neqeroorummi inissiineq

§ 49. Inuk annertuumik innarluutilik 18-it sinnerlugit ukioqartoq Kalaallit Nunaata avataani ulloq unnuarlu neqeroorummiinnissaanut kommunalbestyrelse inassuteqaateqassaaq, ima pisoqartillugu:

- 1) inuk innarluuteqarnini pissutigalugu ulluinnarni annertuumik tapersorsorneqarnissamik pisariaqartitsippat,
- 2) inuk innarluuteqarnini pissutigalugu angerlarsimaffimmini najugaqarsinnaanngippat,
- 3) inuup innarluutillip tapersorsorneqarnissamik pisariaqartitai najugaqatigiiffimmi, najugaqarfimmi illersugaasumi imaluunniit Kalaallit Nunaanni ulloq unnuarlu neqeroorummi naammassineqarsinnaanngippata, aamma
- 4) Kalaallit Nunaata avataani ulloq unnuarlu neqeroorummi inuup innarluutillip pisariaqartitai aatsaat naammassineqarsinnaappata.

Imm. 2. Kommunalbestyrelsip imm. 1 malillugu inassuteqaataa tunngavigalugu Kalaallit Nunaata avataani ulloq unnuarlu neqeroorummiinnissaq Naalakkersuisut aalajangiiffigissavaat.

Imm. 3. Naalakkersuisut Kalaallit Nunaata avataani ulloq unnuarlu neqeroorummiittarneq pillugu maleruagassanik erseqqinnerusunik aalajangersaasinnaapput.

§ 50. Meeqqap annertuumik innarluutillip Kalaallit Nunaata avataani meeqqanut ulloq unnuarlu neqeroorummiinnissaanik kommunalbestyrelse inassuteqaassaaq, ima pisoqartillugu:

- 1) meeraq ulluinnarni annertuumik tapersorsorneqarnissamik imaluunniit immikkuullarissamik tapersorsorneqarnissamik imaluunniit isumassorneqarnissamik annertuumik pisariaqartitsippat,
- 2) meeqqap pisariaqartitai Kalaallit Nunaanni ulloq unnuarlu neqeroorummiinnermi naammassineqarsinnaanngippata, aamma
- 3) meeqqap pisariaqartitai Kalaallit Nunaata avataani meeqqanut ulloq unnuarlu neqeroorummi aatsaat naammassineqarsinnaappata.

Imm. 2. Imm. 1 malillugu Kalaallit Nunaata avataani ulloq unnuarlu neqeroorummi inissiinissamik kommunalbestyrelsip inassuteqaateqarnera tunngavigalugu Naalakkersuisut aalajangiissapput.

Imm. 3. Naalakkersuisut Kalaallit Nunaata avataani meeqqanut ulloq unnuarlu neqeroorummiittarneq pillugu maleruagassanik erseqqinnerusunik aalajangersaasinnaapput.

§ 51. Inuk innarluutiminut piginnaanngorsarnissamik pisariaqartitsippat imaluunniit piginnaanngorsaqqinnermik suliniuteqarfigineqarnissamik pisariaqartitsippat, aammalu pisariaqartitsineq Kalaallit Nunaanni naammassineqarsinnaanngippat, inuk annertuumik innarluutilik ulloq unnuarlu neqeroorummi inissikkallarnissaanik, efterskolemiinnissamik imaluunniit Kalaallit Nunaata avataani assingusumi neqeroorummi isissikkallarnissaanik, kommunalbestyrelse inassuteqaateqassaaq.

Imm. 2. Imm. 1 malillugu kommunalbestyrelsip inassuteqarnera tunngavigalugu Kalaallit Nunaata avataaniikkallarnissaq pillugu Naalakkersuisut aalajangiissapput.

Imm. 3. Naalakkersuisut Kalaallit Nunaata avataani inissinneqarallarnissaq pillugu maleruagassanik erseqqinnerusunik aalajangersaasinnaapput, ilanngullugu inissinneqarallarnerup sivilissusissaa.

Kapitali 8

Inunnik innarluutilinnik 18-it sinnerlugit ukiulinnik ulloq unnuarlu neqeroorummi isumannaallisakkami inissiisarneq

§ 52. Ulloq unnuarlu neqeroorummi isumannaallisakkami, inunnik innarluutilinnik 18-it sinnerlugit ukiulinnik inissiisoqarsinnaavoq, ima pisoqarnerani:

- 1) Kalaallit Nunaanni eqqartuussisarnermi inatsimmi § 358, aamma § 361, imm. 2, nr. 3 naapertorlugit, Inuup innarluutillip angerlarsimaffimmi tulluurtumi imaluunniit ulloq unnuarlu neqeroorummi tigusaanerata attatiinnarneqarnissaa pillugu Eqqartuussivik aalajangiisimappat.
- 2) Kalaallit Nunaanni eqqartuussisarnermi inatsimmi § 359, aamma § 361, imm. 2, nr. 3 inuup innarluutillip angerlarsimaffimmi tulluurtumi imaluunniit ulloq unnuarlu neqeroorummi tiggummigallagaanissaa pillugu eqqartuussivik aalajangiisimappat.

§ 53. Inummik innarluutilimmik 18-it sinnerlugit ukiulimmik ulloq unnuarlu neqeroorummi isumannaallisakkami inissiisoqarsinnaavoq, Kalaallit Nunaanni pinerluttulerineri inatsimmi § 234 naapertorlugu, pinerluttunik Isumaginnittoqarfiup pisortaasa inuup innarluutillip angerlarsimaffimmi imaluunniit ulloq unnuarlu neqeroorummi naleqquttumi inissinneqarnissaa pillugu aalajangiippata.

Kapitali 9

Inissatut neqeroorutininik pilersitsisarneq ingerlatsinerlu

najugaqaqatigiiffiit aamma najugaqarfii illersugaasut

§ 54. Inunnut annertuumik innarluutilinnut najugaqaqatigiiffinnik kommunalbestyrelse pilersitsisinnaavoq, ingerlatsisinnaavoq matusisinnaallunilu. Najugaqaqatigiiffimmi najugaqartunut ulluunerani tapersersuinissamik neqerooruteqassaaq.

Imm. 2. Najugaqaqatigiiffinnik pisariaqartumik amerlassusilinnik inissaqartitsisoqarnissaa kommunalbestyrelsip isumagissavaa.

Imm. 3. Najugaqaqatigiiffinnik pilersitsinissamik Naalakkersuisut kommunalbestyrelse peqqusinnaavaat, ima pisoqartillugu:

- 1) § 44 naapertorlugu inuit innarluutillit 18-ileereersimasut 2-ppata amerlaneruppataluunniit najugaqaqatigiiffimmi inissinneqarnissamat piginnaatitaappata, kommunimi najugaqartuuppata, aamma
- 2) pineqartut taakkua ataatsimoorlutik najugaqaqatigiissinnaappata.

Imm. 4. Najugaqaqatigiiffik ima aaqqissuunneqassaaq, inuit innarluutillit najugaqartut tamarmik nammineq ineeraqarsinnaatillugit, sapinngisamik nammineq uffarfeqartillugit perusuersartarfeqartillugillu aammalu najugaqartut inimik isersimaartarfimmik aamma igaffimmik atugassaqartinneqartillugit.

Imm. 5. Naalakkersuisut najugaqaqatigiiffiit pillugit maleruagassanik erseqqinnerusunik aalajangersaassapput, matuma ataani sulisunut pisortanullu pinerluuteqarsimanginnermik aamma meeqqanik pinerliisimanginnermik uppernarsaammik piniarnissaaq.

§ 55. Inunnut annertuumik innarluutilinnut najugaqarfinnik illersugaasunik kommunalbestyrelse pilersitsisinnaavoq, ingerlatsisinnaavoq matusisinnaallunilu. Najugaqarfik illersugaasoq ulloq unnuarlu tamaat tapersersuinissamik najugaqartunut neqerooruteqassaaq.

Imm. 2. Najugaqarfinni illersugaasuni pisariaqartumik amerlassusilinnik inissaqartitsisoqarnissaa kommunalbestyrelsip isumagissavaa.

Imm. 3. Najugaqarfimmi illersugaasumi najugaqarnissamut siunnerfigineqartut, § 45 naapertorlugu, inuit marluk arlallilluunniit 18-it sinnerlugit ukiullit, kommunimi najugaqartuuppata, Naalakkersuisut kommunalbestyrelse najugaqarfimmik illersugaasumik pilersitsinissamik peqqusinnaavaat.

Imm. 4. Najugaqarfik illersugaasoq aqqissuunneqassaaq inuit innarluutillit najugaqartut tamarmik nammineq ineeraqarsinnaatillugit, sapinngisamik nammineq uffarfeqartillugit igaffeqartillugillu, aammalu najugaqartut inimik isersimaartarfimmik aamma igaffimmik atugassaqartillugit kiisalu sulisunut pigaartumut ineeraqartillugu.

Imm. 5. Naalakkersuisut najugaqarfinnut illersugaasunut maleruagassanik erseqqinnerusunik aalajangersaassapput, matuma ataani sulisunut pisortanullu pinerluuteqarsimanginnermik aamma meeqqanik pinerliisimanginnermik uppernarsaammik piniarnissaaq.

§ 56. Najugaqaqatigiiffiit aamma najugaqarfiit illersugaasut Naalakkersuisunit akuerineqarsimassapput.

Imm. 2. Naalakkersuisut najugaqaqatigiiffiit aamma najugaqarfiit illersugaasut akuerineqartarnerannut aammalu akuersissuteqarnerup tunuartinneqartarneranut maleruagassanik aalajangersaassapput.

§ 57. Inuk kommunimi allami inissisimasumi najugaqaqatigiiffimmiinnissamik imaluunniit najugaqarfimmi illersugaasumiinnissamik neqeroorfigineqassasoq kommunalbestyrelse aalajangerpat, kommunalbestyrelsip inuup najugaqaqatigiiffimmiinneranut imaluunniit najugaqarfimmi illersugaasumiinneranut aningaasartuutit akilissavai.

Imm. 2. Imm. 1 naapertorlugu kommunip avataani najugaqaqatigiiffimmiinnissamik imaluunniit najugaqarfimmi illersugaasumiinnissamik neqerooruteqartoqarpat, kommunalbestyrelsi najugaqarfiup nuunneqarnerani aningaasartuutinut matussutissanik aningaasaqarnikkut tapersiinnissamik neqerooruteqassaaq

§ 58. Kommunilbestyrelse pilersitsisinnaavoq, tassani kommunimi najugaqaqatigiiffiit aamma najugaqarfiit illersugaasut tamarmik imaluunniit aalajangersimasut aallartitaqassallutik, kiisalu sinniisuusut sinnerisa naleqqutsissagaat najugaqaqatigiiffinni najugaqartunut najugaqatigiiffinnilu illersugaasuni najugaqartunut tamakkiisumik sammiveqartumik ataqatigiissaarillutik suliaqarnissartik.

Imm. 2. Oqartussaasut peqataasut suliani ataasiakkaani suleqatigiinnermut ilaatillugu, paasissutissat suliap suliarineqarneranut pingaaruteqarpata, inummut paasissutissat paarlaasseqatigiissutigisinnaavaat, ilanngullugit paasissutissat inummut tunngasut mianerisariiallit.

Inummit suliami pineqartumit, imaluunniit taassuma angajoqqaatut sinniisuanit imaluunniit angajoqqaatut akissussaasumit akuersiviusumik aatsaat, pkt. 1 malillugu paasissutissanik paarlaasseqatigiittoqarsinnaavoq, taamaattoq takuuk imm. 3.

Imm. 3. Akuersineq, imm. 2 naapertorlugu, tunniunneqarumanngippat, imaluunniit allanik pissuteqartumik akuersinerup piniarnissaa ajornarpat, suliami pisut, ilanngullugit inuup inatsisitigit isumannaatsuunissaa eqqarsaatigalugu, tamanna pisariaqartippassuk, paasissutissat inummut tunngasut, ilanngullugit paasissutissat inummut tunngassut mianerisariallit, paarlaasseqatigiissutigineqassapput.

Ulloq unnuarlu neqeroorutit

§ 59. Naalakkersuisut inunnut annertuumik innarluutilinnut ulloq unnuarlu neqeroorummik pilersitsisinnaapput, ingerlatsisinnaapput matusisinnaallutillu. Ulloq unnuarlu neqeroorut paasineqassaaq tassaasoq inunnut innarluutilinnut 18-it sinnerlugit ukiulinnut ulloq unnuarlu neqeroorut, meeqqanut ulloq unnuarlu neqeroorut aamma ulloq unnuarlu neqeroorut matoqqasoq.

Imm. 2. Naalakkersuisut ulloq unnuarlu neqeroorutitut maleruagassanik erseqqinnerusunik aalajangersaassapput, ilanngullugit pilersitsineq, aaqqissugaanera, aqutsisui, ingerlatsineq kiisalu missingersuusiortarneq naatsorsuusiortarnerlu.

§ 60. Ulloq unnuarlu neqeroorut matoqqasoq tassaavoq ulloq unnuarlu neqeroorut matut silarliit igalaallu parnaaqqatittuarnissaannut akuerisaasoq.

§ 61. Ulloq unnuarlu neqeroorut Naalakkersuisunit akuerineqarsimassaaq.

Imm. 2. Naalakkersuisut ulloq unnuarlu neqeroorutitut akuerineqartarnerannut aamma akuersissuteqarnerit tunuartinneqartarnerannut kiisalu ulloq unnuarlu neqeroorummi sulisut pineqaatissinneqarsimanermut allagartaannik aamma meeqqanut allagartaannik piniartarnermut maleruagassanik erseqqinnerusunik aalajangersaassapput.

§ 62. Ulloq unnuarlu neqeroorut ulloq unnuarlu neqeroorummit, kommunalbestyrelsimit, ilinniarfinit, politiinit aamma peqqinnissaqarfimmi suliassaqarfimmit ilaasortaqaartumik, suleqatigiinnermut ataatsimiititaliamik, pilersitsisinnaavoq.

Imm. 2. Ulloq unnuarlu neqeroorut, kommunalbestyrelse, ilinniarfeqarfiit peqqinnissaqarfimmi suliani ataasiakkaani suleqatigiinnermut ilaatillugu, paasissutissat suliap sularineqarneranut pingaaruteqarpata, inummut paasissutissat politiinut ingerlateqqissinnaavaat, ilanngullugit paasissutissat inummut tunngallutik mianernartut. Inummit suliami pineqartumit, imaluunniit taassuma nakkutilliisuanit imaluunniit angajoqqaatut oqartussaasuinit akuersiviusumik paasissutissanik ingerlatitseqqiisoqarsinnaavoq, taamaattoq takuuk imm. 3.

Imm. 3. Akuersineq, naapertorlugu imm. 2, tunniunneqarumanngippat, imaluunniit allanik pissuteqartumik akuersinerup piniarnissaa ajornarpat, suliami pisut, ilanngullugit inuup inatsisitigit isumannaatsuunissaa eqqarsaatigalugu, tamanna pisariaqartippassuk, paasissutissat inummut

tunngasut, ilanngullugit paasissutissat inummut tunngassut mianerisariallit, paarlaasseqatigiissutigineqassapput.

§ 63. Inuup ulloq unnuarlu neqeroorummiinneranut ulloq unnuarlu inissiiviusumut ataatsimut akigititaq aalajangersagaasoq atorlugu kommunalbestyrelse akiliissaaq.

Imm. 2. Imm. 1 naapertorlugu, naalakkersuisut ulloq unnuarlu neqeroorummiinnermut akigititaq ukiumoortumik aalajangersassavaat aammalu tamanut saqqummersissallugu.

§ 64. Ulloq unnuarlu neqeroorut Naalakkersuisunut ukiumoortumik nalunaarusiortassaaq. Naalakkersuisut kingusinnerpaamik Inatsisartut upernaakkut ataatsimiinneranni Inatsisartunut ataatsimoortumik ukiumoortumik nalunaarusiortassapput.

Imm. 2. Naalakkersuisut ukiumoortumik nalunaarusiortinnermut maleruagassanik erseqqinnerusunik aalajangersaasinnaapput.

§ 65. Naalakkersuisut ukiut sisamakkaarlugit ataasiarlutik ulloq unnuarlu neqeroorutitut suliaasaqarfiup ineriartortinneqarnissaanut nuna tamakkerlugu periusissamik suliaqartassapput.

Imm. 2. Periusissami ilaatigut ilaatinneqassapput:

- 1) Ulloq unnuarlu neqeroorummik pilersitsineq matusinerlu.
- 2) Ulloq unnuarlu neqeroorutini ataasiakkaani siunnerfigineqartut kiisalu tassani allanguuteqartitsinissamik kissaatigineqartut.
- 3) Ulloq unnuarlu neqeroorutiniilertarneq angerlartinneqartarnerlu pillugit kommunimik suleqateqarneq, ilanngullugu najugaqatigiiffinnik aamma najugaqarfinnik illersugaasunik suleqateqarneq.
- 4) Suleqatigiinnermut ataatsimiititaliat atornerarnerat, § 62 naapertorlugu.

Imm. 3. Naalakkersuisut ulloq unnuarlu neqeroorutitut pisortat kiisalu kommunalbestyrelsit periusissanik suliaqarnermi akuutissavai.

Kapitali 10

Tikeraarluni angalasarnerit aamma illerfinnik assartuisarneq

Tikeraarluni angalasarnerit

§ 66. Inuk innarluutilik 18-it sinnerlugit ukiulik, tunngavissarititaasut makkua naammassineqarsimappata, sumiiffimmut angerlarsimaffimminut ukiumut ataasiarluni tikeraarluni angalasinnaatitaavoq:

- 1) Inuk najugaqatigiiffimmiippat, § 54 naapertorlugu, najugaqarfimmi illersugaasumiippat, § 55 naapertorlugu, imaluunniit ulloq unnuarlu neqeroorummiippat, § 59 naapertorlugu, aamma
- 2) najugaqarfissatut neqeroorut inuup sumiiffimmi angerlarsimaffiata avataani inissisimappat.

Imm. 2. Tikeraarluni angalaneq, inuk nammineerluni angalasinnaanngippat, qanigisamut ataatsimut arlalinnuunniit ikiorsiissutigineqarsinnaavoq.

Imm. 3. Meeraq innarluutilik, ulloq unnuarlu neqeroorummi, § 59 naapertorlugu, meeqqap angerlarsimaffiata sumiiffiata avataanni inissisimasumi inissinneqarsimasoq, nammineq angerlarsimaffimminut imaluunniit angajoqqaatut akisussaasut angerlarsimaffiannut ukiumut marloriarluni tikeraarluni angalasinnaatitaavoq. Tikeraarluni angalaneq, meeqqamut tamanna pitsaanerpaappat, angajoqqaatut akisussaasumut ataatsimut imarluunniit tamaginnut imaluunniit qanigisamut allamut, taassuma meeqqamut ulloq unnuarlu neqeroorummiittumut tikeraarnissaanut, ikiorsiissutigineqarsinnaavoq. Meeqqap aamma angajoqqaatut akisussaasunut attaveqatigiinnerisa attatiinnarnissaanut tamanna pisariaqarpat, tamannalu meeqqap pisariaqartitsineranut atatinneqarsinnaappat, ukiumut sulii ataasiarluni tikeraarluni angalanissaq ikiorsiissutigineqassaaq. Meeraq ukiumi meeqqap 18-inik ukioqalerfiani katillugit marloriarluni tikeraarluni angalasinnaatitaavoq.

Imm. 4. §§ 49 aamma 50 naapertorlugit, imm. 1 aamma 3 malillugit tikeraarluni angalanerit pillugit aalajangersakkat inunnut innarluutilinnut Kalaallit Nunaata avataani ulloq unnuarlu neqeroorummiittunut, taamaaqataanik atuupput. Taamaattoq inuusuttoq 18-it aamma 24-t akornanni ukioqartoq, Kalaallit Nunaata avataani ulloq unnuarlu neqeroorummiikkallartoq, imm. 1, pkt.1 , apeqqutaatinnagu, sumiiffimmut angerlarsimaffimminut ukiumut marloriarluni tikeraarluni angalasinnaatitaavoq. Inuk, ukiumi inuup 24-nik ukioqalerfiani, marloriarluni tikeraarluni angalasinnaatitaavoq.

Imm. 5. Inuk innarluutilik 18-it sinnerlugit ukiulik, 18-inik ukioqalereernermi kingorna ukiut 10-it sinnerlugit ulloq unnuarlu neqeroorummiissimasoq, imm. 1 naapertorlugu, taamaallaat ukioq allortarlugu sumiiffimmut angerlarsimaffimminut tikeraarluni angalasinnaatitaavoq.

Imm. 6. Imm. 1 aamma 3 malillugit tikeraarluni angalaneq, sumiiffimmut angerlarsimaffigisamut imaluunniit sumiiffimmut angajoqqaatut oqartussaasut angerlarsimaffigisaannut angalaneq, tikinnissaata ajornakusoornera, ikiortissanik periarfissaqannginnera imaluunniit sumiiffimmi angerlarsimaffigisami atortorissaaruteqannginnera pissutaallutik, ajornarpat, illoqarfimmut angerlarsimaffigisap imaluunniit angajoqqaatut oqartussaasut angerlarsimaffigisaata qanitaaniittumut ikiorsiissutigineqarsinnaavoq.

Imm. 7. Kommunalbestyrelsip angalanermut unnuiffissanullu aningaasartuutit kiisalu aningaasartuutit akilissavai:

- 1) imm. 1-3 malillugit tikeraarluni angalanermut atatillugu tapersersorneqarnissamut pisariaqartumut, ilanngullugit ingiaqateqarneq aamma immikkut tapersersuineri iliuusissat.
- 2) tikeraarluni angalanerup nalaani kiisalu ingiaqataasup angerlarsimaffiata aamma najugaqarfissatut neqeroorutip akornanni ingiaqataasup angalanerani ingiaqataasumut angalanermut.
- 3) ullut 9-t angullugit angalanerimi ullut amerlassuserpiaanni. Tikeraarluni angalanerup aallartinnerani naanerani piffissaq angalaffiusoq, ulluni unnuanilu 9-ini ilanngunneqassanngilaq.

Imm. 8. Naalakkersuisut tikeraarluni angalanerit aqqissuunneqartarnerat aningaasartuutillu akilerneqartarnerat pillugit maleruagassanik aalajangersaasinnaapput.

§ 67. Inuk innarluutilik, § 66-imi pineqartunut ilaasoq, ilaqtanni qanigisani peruluttumik napparsimasoqarneranut, toqusoqarneranut imaluunniit ilisisoqarniarneranut atatillugu Kalaallit

Nunaannut imaluunniit Kalaallit Nunaata iluani angalanermut tapersiivigineqarnissamut pisinnaatitaavoq.

Imm. 2. Kommunalbestyrelsip angalanermut unnuinermullu aningaasartuutit kiisalu aningaasartuutit makku akilissavai:

- 1) imm. 1 malillugu angalanermut atatillugu tapersiinerumut pisariaqartumut, ilanngullugu ingiaqateqarneq aamma immikkut issumik tapersiinerik iliuseqarnerit,
- 2) angalanerup nalaani ingiaqateqarneq, kiisalu ingiaqataasup angerlarsimaffiata aamma najugaqarfissatut neqeroorutip akornanni angalanera, aamma
- 3) ullut unnuallu 9-t angullugit ullut angalaffiusut amerlassusaanni. Tikeraarluni angalanerup aallartinnerani naammassineranilu piffissaq angalaffiusoq ulluni unnuanilu 9-ni taakkunani ilanngunneqassanngilaq.

Imm. 3. Inuk innarluutilik, § 66-imi pineqartunut ilaasoq, annertunerusumik nalliuttorsiorpat imaluunniit perululluni napparsimappat, ilaquuttani qanigisamut ataatsimut arlalinnuunniit Kalaallit Nunaannut imaluunniit Kalaallit Nunaata iluani angalanissamut kommunalbestyrelse tapersiisinnaavoq.

Imm. 4. Naalakkersuisut tikeraarluni angalanerit aaqqissuunneqartarnerat aamma aningaasartuutit akilerneqartarnerat pillugit maleruagassanik aalajangersaasinnaapput.

Illerfimmik angallassineq

§ 68. Inuit, § 66-imi pineqartunut ilaasut, sumiiffimmi angerlarsimaffigisamik avataaniittumiitillutik toqukkat qimagunneranni, kommunalbestyrelse illerfiup assartornissaanut aningaasartuutit tamakkiisumik ilaannakortumilluunniit matussutissaattut tapersiisinnaavoq.

Kapitali 11

Tapersiinerup allanngortinneqartarnera atorunnaarsinneqartarneralu

§ 69. Inuk innarluutilik pisariaqartumik tapersersorneqarnerisooq kommunalbestyrelsip ingerlaavartumik nalilersortassavaa.

Imm. 2. Tapersiinerup inuup pisariaqartitaannik naammassinniffiusinnaajunnaarnerani, inummut innarluutilimmut tapersiineq allanngortinneqassanersooq, kommunalbestyrelse aalajangiissaaq.

Imm. 3. §§ 74 aamma 75 naapertorlugit, kommunalbestyrelsip, tapersiinerup allanngortinneqarnissaa pillugu aalajangiisoqannginnerani, inuk innarluutilik taassumalu angajoqqaatut sinniisorisaannaasaa imaluunniit angajoqqaatut akisussaasut oqaloqatigisimassavai.

Imm. 4. Inuup pisariaqartitaasa naammassinissaannut tapersiineq pisariaqarunnaarpat, § 1 naapertorlugu, inummut innarluutilimmut tapersiinerup unitsinneqarnissaa pillugu kommunalbestyrelse aalajangiissaaq.

Imm. 5. Immikkut ittumik tapersiineq, kapitali 7 naapertorlugu, unitsinneqassasoq aalajangiisoqannginnerani, kommunalbestyrelse iliuusissanut pilersaarummik suliaqarsimassaaq, § 79 naapertorlugu.

§ 70. Inummut 18-it sinnerlugit ukiulimmut innarluutilimmut tunngatillugu ulloq unnuarlu neqeroorummiinnerup unitsinneqarnissaa pillugu kommunalbestyrelsip aalajangiinnginnerani, kommunalbestyrelsip qulakkiissavaa

- 1) inuup ulloq unnuarlu neqeroorummit angerlartinneqareernerata kingorna pisariaqartitaasa naammassineqarnissaannut pisariaqartumik inuup tapersorsorneqarnissaa,
- 2) inuup ulloq unnuarlu neqeroorummit angerlartinneqareernerata kingorna tapersiinnermut § 79 malillugu iliuusissanut pilersaarummik suliaqartoqarnissaa,
- 3) § 74 naapertorlugu, inuup immaqalu taassuma angajoqqaatut sinniisua oqaloqatigineqarsimanissaat, aamma
- 4) ulloq unnuarlu neqeroorummit allaganngorlugu oqaaseqaammik piniartoqarsimanissaa.

Imm. 2. § 17 imm. 1, nr. 7 naapertorlugu, ulloq unnuarlu neqeroorut oqaaseqaateqarpat, takuuk imm. 1, nr. 4, inuup ulloq unnuarlu neqeroorummiinnera ingerlatiinnarneqassasoq inassutigalugu, kommunalbestyrelsi Nuna Tamakkerlugu Innarluutilinnut Sullissivimmit oqaaseqaammik piniassaaq. Ulloq unnuarlu neqeroorummiititsinerup unitsinneqarnissaa pillugu aalajangiisoqannginnerani, Nuna tamakkerlugu innarluutilinnut sullissivimmit oqaaseqaatip tiguneqarnissaa kommunalbestyrelsip utaqqissavaa.

Imm. 3. Ulloq unnuarlu neqeroorummiinnerup unitsinneqarnissaa, imm. 1 naapertorlugu, inummut innarluutilimmut tunngatillugu mianerisassat imaluunniit mianerisassat annertuut allat ilimasaarinissamut piffissaliussap taassuma saneqqunneqarnissaa pisariaqartissimanngippassuk, inissinneqarnerup unitsinneqarnissaa sioqqullugu minnerpaamik sapaatit akunnerinik 12-inik ilimasaarutigineqassaaq. Inuup innarluutillip imaluunniit taassuma angajoqqaatut sinniisuata inissisimanerup unitsinneqarnissaa erseqqissumik akuerisimappassuk, sapaatit akunnerini 12-ini ilimasaarinissaaq pillugu piumasaqaat saneqqunneqarsinnaavoq.

Imm. 4. Imm. 1, nr. 1-3-imi aamma imm. 3-imi aalajangersakkat, inuit 18-it sinnerlugit ukiullit innarluutillit, Kalaallit Nunaata avataani najugaqarfissatut neqeroorummiinnerisa unitsinneqarnissaat pillugu kommunalbestyrelsip aalajangiinerinut taamaaqataanut atuupput. Kommunalbestyrelse aamma inissisimanerup unitsinneqarnissaa pillugu aalajangiisoqannginnerani, Kalaallit Nunaata avataani kommunimi najugarisamit allaganngorlugu nassuiaammik piniassaaq.

§ 71. Meeqqap innarluutillip ulloq unnuarlu neqeroorummiinnerata unitsinneqarnissaa pillugu kommunalbestyrelsip aalajangiinnginnerani, kommunalbestyrelsip qulakkiissavaa

- 1) meeqqap ulloq unnuarlu neqeroorummit angerlartinneqareernerata kingorna meeqqap pisariaqartitaasa naammassineqarnissaannut pisariaqartumik tapersorsorneqartoq,
- 2) meeqqamut, angajoqqaatut akisussaasunut immaqalu meeqqap attaveqaataannut piffissami ulloq unnuarlu neqeroorummiinnerup uninnissaa sioqqullugu tamatumalu kingorna tapersiissutissaasinnaasunik piareersaasoqarsimasoq,
- 3) ulloq unnuarlu neqeroorummit angerlartinneqareernerup kingorna meeqqap tapersorsorneqarnissaanut § 79 malillugu iliuusissanut pilersaarummik suliaqartoqarsimasoq,
- 4) meeraq oqaloqatigineqarsimasoq, § 75 naapertorlugu,

5) ulloq unnuarlu neqeroorummit allaganngorlugu oqaaseqaammik piniartoqarsimasoq, aamma
 6) meeraq aamma angajoqqaatut akisussaasoq imaluunniit ilaqutaasut allat ulloq unnuarlu neqeroorummiinnerup unitsinneqarneranut piareersimalluartut.

Imm. 2. Ulloq unnuarlu neqeroorut oqaaseqaateqarpat, imm. 1, nr. 5 naapertorlugu, meeraq ulloq unnuarlu neqeroorummiiginnassasoq inassutigalugu, kommunalbestyrelsi Nuna Tamakkerlugu Innarluutilinnut Sullissivimmit, allaganngorlugu oqaaseqaammik piniarnissamut, kommunalbestyrelse akisussaasuvoq. Ulloq unnuarlu neqeroorut oqaaseqaateqartoq, meeraq ulloq unnuarlu neqeroorummiiginnassasoq inassuteqarpat, kommunalbestyrelse Nuna tamakkerlugu Innarluutilinnut Sullissivimmit, § 17, imm. 1, nr. 7 naapertorlugu, oqaaseqaammik piniassaaq. Kommunalbestyrelsip, ulloq unnuarlu neqeroorummiinnerup unitsinneqarnissaa pillugu inaarutaasumik aalajangiinissaaq sioqqullugu, Nuna tamakkerlugu innarluutilinnut sullissivimmit oqaaseqaatip tiguneqarnissaa, utaqqissavaa.

Imm. 3. Meeraq, angajoqqaatut akisussaasut aamma ulloq unnuarlu neqeroorut sioqqusumik minnerpaamik sapaatit akunnerini 12-ini ilimasaarneqariinngippata, meeqqamut mianerisassat imaluunniit mianerisassat allat annertuut ilimasaarinissamut piffissaliussap taassuma saneqqunneqarnissaa pisariaqartilersimanngippagu, angerlartitsineq pisinnaangilaq.

Imm. 4. Imm. 1, nr. 1-4-mi aamma imm. 3-mi aalajangersakkat taamaaqataanik meeqqamut innarluutilinnut tunngatillugu Kalaallit Nunaata avataani najugaqarfissatut neqeroorummiinnerup unitsinneqarnissaa pillugu kommunalbestyrelsip aalajangiinerinut atuupput. Kommunalbestyrelse aamma inissinneqarfiup unitsinneqarnissaa pillugu aalajangiisoqartinnagu, Kalaallit Nunaata avataani kommunimit najugarisamit allaganngorlugu nassuiaammik piniassaaq.

Kapitali 12

Sulianik suliarinninnermut maleruagassat

Piffissaliussat

§ 72. Kommunalbestyrelsip taperserneqarnissaaq imaluunniit immikkut ittumik taperserneqarnissaaq pisinnaatitaaffigineqarnersooq, taamaattoqarpallu suut tapersiissutaassanersut, Inatsisartut inatsisaat manna malillugu tapersiinnissamut apeqqutit sapinngisamik sukkasuumik suliarissavai.

Imm. 2. Taperserneqarnissaaq imaluunniit immikkut ittumik taperserneqarnissaaq pillugu qinnuteqaatip tiguneqarneranit, aalajangiinerup pereersimanissaanut, piffissaaq qanoq sivistigissanersooq, kommunalbestyrelse piffissamut killiliussanik aalajangersaasinnaavoq. Piffissamut killissaliussat tamanut saqqummiunneqassapput.

Imm. 3. Piffissamut killiliussaaq, imm. 2 naapertorlugu, suliami ataasiakkaami malinneqarsinnaanngippat, inuk innarluutilik imaluunniit taassuma angajoqqaatut sinniisuata, aalajangiineq qaqugu pisinnaanersooq allaganngorlugu nalunaarfigineqassaaq.

§ 73. Kommunalbestyrelsip periarfissanut isumaginninnermut inatsisit malillugit ikiorsiinissamut tapersiinissamullu atuuttunut tamaginnut tunngatillugu qinnuteqaatit aamma tapersiinissaq pillugu apeqqutit, suliarissavai, ilanngullugit aamma siunnersuineq ilitsersuinerlu.

Imm. 2. Kommunalbestyrelsip tamatuma saniatigut, oqartussami allami imaluunniit inatsisit allat malillugit ikiorserneqarnissaq imaluunniit tapersiivigineqarnissaq pillugu qinnuteqartoqarsinnaanersoq, eqqumaffigissavaa.

Oqaloqateqarneq

§ 74. Kommunalbestyrelsip aalajangiisoqannginnerani §§ 23, 38, 69 aamma 70 naapertorlugit, inuk 18-it sinnerlugit ukiulik innarluuteqartoq minnerpaamik ataasiarluni oqaloqatigissavaa imaluunniit § 46 naapertorlugu inassuteqaateqarsinnaalluni.

Imm. 2. Kommunalbestyrelsip imm. 1 malillugu oqaloqateqarnermini inuup innarluuteqarnera mianerissavaa aammalu oqaloqateqarneq inuup innarluutillip piumasai tunngavigalugit ingerlanneqassaaq.

Imm. 3. Inuup innarluutillip angajoqqaatut sinniisoqartup, imm. 1 malillugu oqaloqatigineqarnera, inuk innarluutilik aamma angajoqqaatut sinniisua peqataatillugit ingerlanneqassaaq. Taamaattoq inummut innarluutilimmut mianerisassat tamanna pisariaqartippassuk, angajoqqaatut sinniisoq akuersitinnagu imaluunniit najuutsinnagu oqaloqateqarneq ingerlanneqarsinnaavoq.

Imm. 4. Inuup inerisimanagera piginnaasaqarneralu imaluunniit suliap suussusaa eqqarsaatigalugit oqaloqateqarnerup ingerlanneqarnissaa aalajangiisuusumik naleqqutinngippat, imm. 1 malillugu oqaloqateqarneq kommunalbestyrelsip ingerlatinngissinnaavaa. Oqaloqateqarneq ingerlanneqarsinnaanngippat, inuup innarluutillip aalajangiinissatut eqqarsaatigineqartumut isumaa allatut pissarsiariniarneqassaaq.

§ 75. Kommunalbestyrelsip §§ 23, 38, 69 aamma 71 naapertorlugit aalajangiinnginnermi, ukiulik innarluutilik minnerpaamik ataasiarluni oqaloqatigissavaa imaluunniit § 48 naapertorlugu inassuteqaateqartoqassalluni.

Imm. 2. Kommunalbestyrelsip imm. 1 malillugu oqaloqateqarnermini meeqqap innarluuteqarnera mianerissavaa aammalu oqaloqateqarneq meeqqap piumasai tunngavigalugit ingerlatissallugu.

Imm. 3. Oqaloqateqarneq meeqqap mianerineqarnissaanut tamanna pisariaqarpat, angajoqqaatut akisussaasoq akuersitinnagu ingerlanneqarsinnaavoq.

Imm. 4. Meeqqap inerisimassusaa piginnaasaalu imaluunniit suliap suussusaa oqaloqateqarnerup ingerlanneqarnissaanut aalajangiisuusumik naleqqutinngippata, kommunalbestyrelsip imm. 1 malillugu oqaloqateqarneq ingerlatinngissinnaavaa. Oqaloqateqarneq ingerlanneqarsinnaanngippat, aalajangiinissatut eqqarsaatigineqartumut meeqqap isumaa allatut pissarsiariniarneqassaaq.

Innarluutilinnik illersuisoq

§ 76. Inuup innarluutillit illersuisumit tapersersorneqarnissamik neqeroorfigineqarnissaa siunertaralugu kommunalbestyrelse illersuisoqarnermut aaqqissuussinermik pilersitsinnaavoq:

- 1) Kommunalbestyrelsip Inatsisartut inatsisaat manna malillugu tapersiinissaq imaluunniit immikkut ittumik tapersiinissaq pillugu suliamik suliarinninneranut,
- 2) Kommunalbestyrelsip Inatsisartut inatsisaat manna malillugu tapersiinissaq imaluunniit immikkut ittumik tapersiinissaq pillugu aalajangiinneranut naammagittaalliummik suliaqarnissamut tunniussinissamullu, aamma
- 3) Inatsisartut inatsisaat manna malillugu tapersiinissaq imaluunniit immikkut ittumik tapersiinissaq pillugu aalajangiinnermut tunngatillugu naammagittaalliummut suliamik Isumaginninnermi Naammagittaalliuuteqartarfiup suliarinninneranut.

Imm. 2. Naalackersuisut toqqaasarneq, aningaasarsiaqartitsisarneq, pinerluuteqarsimannginnermut uppersaammik piniartarneq, kiisalu piukkunnassutsinut piginnaasaqarfinnullu piumasqaatit suut illersortinut piumasqaatigineqartassanersut pillugit maleruagassanik aalajangersaasinnaapput.

Qulaajaaneq

§ 77. Kommunalbestyrelse, inuk kapitali 7 malillugu immikkut ittumik tapersorneqarnissamik pisariaqartitsisoq ilimagineqartariaqarpat, inummut innarluutilimmut tunngasunik qulaajaanermik suliaqassaaq. Taamaattoq qulaajaanissaq pisariaqanngitsoq ersarippat, qulaajaaneq ingerlanneqassanngilaq.

Imm. 2. Qulaajaaneq sapinngisamik inuk innarluuteqartoq, inuk angajoqqaatut sinniisoqarsimappat taassuma angajoqqaatut sinniisaa, meeraasimappat tassunga angajoqqaatut akisussaasoq kiisalu isumassuisui allat suleqatigalugit ingerlanneqassaaq.

Imm. 3. Qulaajaaneq pissutsit ajornartinnngisaannik qajassuussisumik ingerlanneqassaaq, aammalu siunertaasuni allassimasunit annertunerusinnaanani.

Imm. 4. Qulaajaaneq ataqatigiissummik tamakkiisumillu isiginnittumik suliniuteqarnissamut naammattumik tunngavissaliissaaq.

Imm. 5. Kommunalbestyrelsip qulaajaanermut atatillugu makkua nalilersussavai:

- 1) Timikkut tarnikkullu innarluuteqarnerup annertussusaa.
- 2) Imminut isumassorneq.
- 3) Pissusilersorneq, atugarissaarneq ineriartornerlu.
- 4) Attaveqatigiinneq.
- 5) Ilaqutariinnermut tunngasut.
- 6) Inooqatigiinnermut tunngasut aamma inoqatinut attaveqarneq.
- 7) Peqqissutsimut tunngasut.
- 8) Suliffissaqartitsiniarneq aamma suliffeqarnissamut periarfissat.
- 9) Inuiaqatigiinni peqataaneq.
- 10) Inatsisartut inatsisaat manna malillugu imaluunniit inatsisit allat malillugit tapersersuineq inummut ikiorsiissutigineqareersut.

Imm. 6. § 79 naapertorlugu, qulaajaaneq allaganngorlugu iliuusissanut pilersaarummik tunngavilersugaasumik inerneqassaaq.

Imm. 7. Kommunalbestyrelse immikkut tapersiinissaq pillugu aalajangiigallarsimappat, § 38, imm. 3 naapertorlugu, immikkut tapersiineq aalajangiigallarneq tunngavigalugu aallartinneqartoq ingerlatiinnarneqassanersoq imaluunniit unitsinneqassanersoq, kommunalbestyrelse qulaajaanerup naammassineranut atatillugu isummissaaq. Tassunga atatillugu inuk taassumalu angajoqqaatut sinniisorisaataluunniit imaluunniit angajoqqaatut akisussaasut tapersiinnermut isummernissaat eqqarsaatigineqassaaq.

Imm. 8. § 17, imm. 1, nr. 6 malillugu, kommunalbestyrelse suliani immikkut pisariussusilinni Nuna tamakkerlugu innarluutilinnut sullissivik imm. 1 malillugu qulaajaanerup ingerlannissaa pillugu qinnuigisinnaavaa.

Imm. 9. Kommunalbestyrelse qulaajaaneg tunngavigalugu tapersiinnermik imaluunniit immikkut ittumik tapersiinnermik aallartitsinissamut tunngavissaqarnersoq, aalajangiissaaq.

Imm. 10. Naalackersuisut qulaajaanermut maleruagassanik erseqqinnerusunik aalajangersaassapput.

§ 78. Meeqqamat innarluutilimmut tunngatillugu qulaajaanermi, § 77 naapertorlugu, kommunalbestyrelsip qulaajaanermi atatillugu paasiniassavaa, meeraq inatsisit allat malillugu tapersiivigineqarsimanersoq aammalu pissutsit taakkua qulaajaanermi ilaatissallugit. Tamatuma kingorna qulaajaanermut ilaatillugu meeqqap tapersersorneqarnissamik pisariaqartitsinerata tamakkiisumik isiginnittumik nalilersorneqassaaq, ilanngullugu tapersersuineq meeqqap inooqataanermi ajornartorsiorneranik imaluunniit immikkut pisariaqartitsineranik tunngavilersugaasoq. Inatsisit allat malillugu tapersiisoqarsimappat, tamanna Inatsisartut inatsisaat manna malillugu meeqqap tapersersorneqarnissamik pisinnaatitaaneranut killiliissannigilaq.

Iliuusissanut pilersaarut

§ 79. Kommunalbestyrelse inummut innarluutilimmut allaganngorlugu iliuusissanut pilersaarummik suliaqassaaq:

- 1) § 77 naapertorlugu, qulaajaanermut atatillugu.
- 2) Kapitali 7, naapertorlugu Immikkut tapersiinerup aallartinnissaa pillugu aalajangiisoqannginnerani.
- 3) Kapitali 11 naapertorlugu, immikkut tapersiinerup unitsinneqarnissaa pillugu aalajangiisoqannginnerani.
- 4) Meeqqap innarluutillip, Inatsisartut inatsisaat manna malillugu tapersiivigineqartup, meeqqat atuarfianni atuarnerata naammassinissaa kingusinnerpaamik qaammatinik 12-inik sioqqullugu.
- 5) Meeqqap innarluutillip, Inatsisartut inatsisaat manna malillugu tapersiivigineqartup, 18-inik ukioqalernissaanut kingusinnerpaamik qaammatit 12-iinnanngorneranni.

Imm. 2. Iliuusissanut pilersaarut inummut innarluutilimmut tunngasuussaaq aammalu siunertaasup allassimaneranit, annertunerusinnaanani.

Imm. 3. Iliuusissanut pilersaarummi allassimassapput:

- 1) Siunertaq aamma tapersiinnermi anguniagaq.
- 2) Anguniagaq imaluunniit anguniakkat anguneqarnissaannut tapersiineq suna pisariaqarnersoq.

- 3) Tapersiinerup sivilissusissaatut naatsorsuutigineqartoq.
- 4) Tapersiinerup malinnaavigineqarnissaa, ilanngullugu malinnaaneq qaqugukkut pisassanersoq.
- 5) Inatsisartut inatsisaat manna malillugu aamma inatsisit allat malillugit tapersiinerit allat ataqatigiinnerat.
- 6) Ilaquttat attaveqarfiillu, najugaqariaaseq, ilinniartitaaneq, suliffeqarneq, inuttut ikiorteqarneq, katsorsartinneq aamma atortorissaarutit ikiuutaasussat il.il. pillugit pissutsit immikkut ittut allat.
- Imm. 4.* Iliuississatut pilersaarut sapinngisamik inuk innarluutilik taassumalu angajoqqaatut sinniisorisinnaasaa imaluunniit angajoqqaatut akisussaasui aamma allat isumassuisui oqaloqatigalugit suleqatigalugillu suliarineqassaaq.
- Imm. 5.* Najugaqarfissatut neqeroorummiinnermi, kapitali 9 naapertorlugu, iliuississatut pilersaarutit ilai attuumassuteqartut najugaqarfissatut neqeroorummut tunniunneqarnissaat kommunalbestyrelsip isumagissavaa.
- Imm. 6.* Iliuississatut pilersaarut inummut innarluutilimmut taassumalu angajoqqaatut sinniisorisinnaasaata imaluunniit angajoqqaatut akisussaasuinut tunniunneqassaaq, aammalu kommunalbestyrelse tunniussinnermut atatillugu taassuma imarisai pillugit ilisimatitsissaaq.
- Imm. 7.* Naalackersuisut iliuississatut pilersaarutit ilusaa imarisaalu kiisalu sulianik ingerlatitsinnermut aamma iliuississatut pilersaarutit naammassineqarnissaanut piffissatigut piumasqaatit pillugit maleruagassanik erseqqinnerusunik aalajangersaassapput.

Ineriartortitsinissamut pilersaarut

§ 80. Ulloq unnuarlu neqeroorut inummut innarluutilimmut iliuississatut pilersaarut aallaavigalugu ineriartortitsinissamut pilersaarummik ukiumut minnerpaamik ataasiarluni suliaqartassaaq. Ineriartortitsinissamut pilersaarummi, iliuississatut pilersaarummi siunertaasut aamma ulloq unnuarlu neqeroorummiittitsinnermut anguniakkat aallaavigalugit, perorsaanikkut peqqissaanermullu suliaqarneq, iliuississatut pilersaarummi anguniakkat anguneqarnissaannik qulakkeeriviusussat, nassuiarneqassapput.

Imm. 2. Naalackersuisut inunnut ulloq unnuarlu neqeroorummiittunut ineriartortitsinnermut pilersaarutit ilusaa imarisaalu pillugit maleruagassanik erseqqinnerusunik aalajangersaassapput.

Killiffinnut nalunaarusiaq

§ 81. Ulloq unnuarlu neqeroorutit, kommunalbestyrelsip § 12, imm. 2 malillugu inummut tunngasumik nakkutilliinnermini atugassaanik, inummut innarluutilimmut tunngasut aamma ulloq unnuarlu neqeroorummiinnerup nalaani ineriartortit pillugit, killiffinnut nalunaarusiatut ilusilimmik, kommunalbestyrelse ilisimatissavaa. Ulloq unnuarlu neqeroorutit, inuup peqqissusaanut tunngasuni imaluunniit inooqataanerani tunngasuni annertuumik allanngortoqarpat imaluunniit allanngortoqassasoq naatsorsuutigineqarpat, piaartumik kommunalbestyrelse nalunaarfigissavaa.

Imm. 2. Ulloq unnuarlu neqeroorut killiffinnut nalunaarusiamik suliaqartassaaq aammalu taanna ulloq unnuarlu neqeroorummiinnerup aallartinnerata kingorna kingusinnerpaamik qaammatit pingasut qaangiunneranni, tamatumalu kingorna ukioq affakkaarlugu 1-eriarluni kommunalbestyrelsimut nassiuttassallugu. Killiffinnut nalunaarusiaq inuup innarluutillip atugarissaarnera ineriartorneralu pillugit, iliuusissanut pilersaarummut, § 79 naapertorlugu, aamma ineriartortitsinermut pilersaarummut, naapertorlugu § 80 naapertorlugu, sanilliullugu isigalugu, paasissutissanik imaqassaaq.

Imm. 3. Naalackersuisut inunnut innarluutilinnut ulloq unnuarlu neqeroorummiittunut killiffinnut nalunaarusiap ilusaa imarisaalu pillugit maleruagassanik erseqqinnerusunik aalajangersaassapput.

Paasissutissiisussaatitaaneq

§ 82. Kommunalbestyrelsip inuk innarluutilik, Inatsisartut inatsisaat manna malillugu tapersiivigineqarnissamik qinnuteqartoq, piumaffigisinnaavaa

- 1) paasissutissat inuup qanoq tapersiivigineqarnissamut pisinnaatitaaneramik kommunalbestyrelsip aalajangiisinaanissaanut pisariaqartunik pissarsiniarnermi peqataassasoq, aamma
- 2) § 77 naapertorlugu, nakorsamit misissortissasoq imaluunniit qulaajaanermut ilaatillugu malinnaavigineqarnissamut katsorsartinnissamullu napparsimavimmut unitsinneqassasoq.

Imm. 2. Kommunalbestyrelse, sapinngisamik inuup innarluutillip akuersineratigut oqartussanit allanit inummut innarluutilimmut tunngasunik ilisimasaqartunit imaluunniit inummik innarluutilimmik ilisarismannittunit paasissutissanik, Inatsisartut inatsisaat manna malillugu tapersiivigineqarnissaq pillugu qinnuteqaatip suliarineqarsinnaanissaanut pisariaqartutut isigineqartariaqartunik, piniarsinnaavoq.

Nalunaarutiginnittussaatitaaneq aamma utertillugit akiliisussaatitaaneq

§ 83. Inuk innarluutilik Inatsisartut inatsisaat manna malillugu tapersiivigineqartoq, taassumalu angajoqqaatut sinniisorisinnaasaa imaluunniit angajoqqaatut akisussaasui, inummut innarluutilimmut tunngasuni allannguutit tamaasa, tapersiinerup tamakkiisumik ilaannaasumilluunniit allangortinneqartariaqarnerannik imaluunniit unitsinneqarnissaannik malitseqarsinnaasut, pillugit kommunalbestyrelsip ilisimatinnissaanik pisussaaffeqarput.

Imm. 2. Inuup imm. 1-imi paasissutissiisussaatitaaneq taaneqartoq naammassinngippagu imaluunniit ilisimareeraluarlugu Inatsisartut inatsisaat manna malillugu tapersiissutinik pisinnaatitaanani tigusaqarsimappat, kommunalbestyrelsip tiguneqarsimasut utertillugit akilerneqassasut imaluunniit utertillugit tunniunneqassasut piumasarisinnaavaa.

Imm. 3. Naalackersuisut tapersiissutinik imm. 2 malillugu pisussaatitaanani tiguneqarsimasunik utertillugit akiliisarneq pillugu maleruagassanik aalajangersaasinnaapput, ilagalugu maleruagassat utertitsilluni akiliinissamut piffissaliinermut tunngasut, isumaqatigiissutit il.il.

Kapitali 13

Naammagittaalliortarneq

§ 84. Inatsisartut inatsisaat manna malillugu aalajangiineri isumaginnittoqarfiup aquneqarnera aaqqissuussaanageralu pillugit Inatsisartut peqqussutaanni aalajangersakkat malillugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

Imm. 2. Inuk innarluutilik imaluunniit taassuma suliami sinniisuutitaa, ilanngullugu illersorti, § 76 naapertorlugu, naammagittaalliuummik imm. 1 malillugu suliakkiussinissaq pillugu Nuna tamakkerlugu innarluutilinnut sullissivimmit siunnersorneqarnissamik ilitsersorneqarnissamillu qinnuteqarsinnaavoq.

Imm. 3. Isumaginninnermi Naammagittaalliuuteqartarfik imm. 1 malillugu naammagittaalliuummik suliaqarnerminut ilaatillugu Nuna Tamakkerlugu Innarluutilinnut Sullissivimmit oqaaseqaammik piniarsinnaavoq Nuna Tamakkerlugu Innarluutilinnut Sullissiviup oqaaseqaammik suliaqarneranut atatillugu, paasissutissat suliap suliarineqarnissaanut pingaaruteqarpata, Isumaginninnermi Naammagittaalliuuteqartarfik aamma Nuna Tamakkerlugu Innarluutilinnut Sullissivik inummut paasissutissanik paarlaasseqatigiissinnaapput, ilanngullugit paasissutissat inummut tunggassutilit mianerisariallit. Paasissutissanik paarlaasseqatigiinneq aatsaat inuup suliami pineqartup, imaluunniit taassuma nakkutiginnittuata imaluunniit angajoqqaatut oqartussaasuata akuersineratigut, pisinnaavoq.

Kapitali 14

Innarluutilinnut siunnersuisooqatigiit, innarluutilinnut politikki aamma pitsaassusissanut malitassat

§ 85. Kommunalbestyrelse innarluutilinnut siunnersuisooqatigiinnik pilersitsissaaq. Innarluutilinnut siunnersuisooqatigiit innarluutilinnut politikikkut apeqqutini kommunalbestyrelsimut siunnersuisapput aammalu innuttaasup aamma kommunalbestyrelsip akornanni najukkami politikikkut apeqqutit tamaasa, inunnut innarluutilinnut tunggasut, pillugit isummersuutiniq ingerlatitseqqiisassallutik.

Imm. 2. Kommunalbestyrelsip innarluutilinnut siunnersuisooqatigiit suliniutit inunnut innarluutilinnut pingaaruteqartut tamaasa pillugit tusarniaaffigisassavai.

Imm. 3. Innarluutilinnut siunnersuisooqatigiit apeqqutit inunnut ataasiakkaanut tunggasut suliarisinnaanngilaat.

Imm. 4. Innarluutilinnut siunnersuisooqatigiinni ilaasortat sisamat aamma arfineq pingasut akornanni amerlassuseqarput. Innarluutilinnut siunnersuisooqatigiit, kommunalbestyrelsimit aallartitanik, kommunimi imaluunniit allani isumaginninnermut suliaasaqarfimmi kommuni sullillugu suliaassanik attuumassuteqartunik suliaqartartuni sulisunik, aammalu innarluutillit peqatigiiffiinit aallartitanik, amerlaqatigiinnik ilaasortaqaartillugit katitigaassapput. Kommunalbestyrelse innarluutilinnut siunnersuisooqatigiinni aallartitaqassaaq.

Imm. 5. Kommunalbestyrelse pisariaqartinneqartutut annertussusilimmik innarluutilinnut siunnersuisooqatigiinnut allattoqarfisigut ikiuutissaaq.

Imm. 6. Naalakkersuisut innarluutilinnut siunnersuisooqatigiit suliaqarnerat katitigaanerallu pillugit maleruagassanik erseqqinnerusunik aalajangersaassapput.

§ 86. Kommunalbestyrelse ataqatigiisumik innarluutilinnut politikimik ilusilersuissaaq. Innarluutilinnut politikki, inuit innarluutillit qanoq sullinneqarnissaat naatsorsuutigineqarsinnaanersoq imaluunniit qanoq pisinnaatitaaffeqarnerisut, pillugit paasissutissanik imaqassaaq. Innarluutilinnut politikki aamma kommunalbestyrelsip qanoq iliorluni innarluutilinnut tunngasut kommunimi suliaqarfinni tamani politikkini pilersaarusiornernilu ilanngutsinnissaat qulakkiissaneraa pillugu paasissutissanik imaqassaaq.

Imm. 2. Kommunalbestyrelsip kommunip innarluutilinnut politikimik suliaqarneranut innarluutilinnut siunnersuisooqatigiit, § 88 naapertorlugu, akuutissavai.

Imm. 3. Innarluutilinnut politikki allaganngorlugu ilusilersorneqassaaq aammalu kommunip nittartagaani tamanut ammasumik saqqummiunneqassalluni.

Imm. 4. Kommunalbestyrelsip innarluutilinnut politikki ilisimatitsissutitut Naalakkersuisunut nassiatissavaa.

Imm. 5. Innarluutilinnut politikki sivisunerpaamik ukiut sisamakkaarlugit iluarsineqartassaaq.

§ 87. Kommunalbestyrelse Inatsisartut inatsisaat manna malillugu inunnut innarluutilinnut tapersiisarnerup pitsaassusissaannik aalajangersaassaaq. Pitsaassusissat tapersiinerit ataasiakkaat suussusaasa imarisai, annertussusai ingerlanneqarnissaalu pillugit paasissutissanik imaqassapput. Kommunalbestyrelse, pitsaassusissat aalajangersagaasut qanoq malinnaavigineqassanersut, aalajangiissaaq.

Imm. 2. Kommunalbestyrelsip Inatsisartut inatsisaat manna malillugu tapersiinerisa tamarmik imaluunniit aalajangersimasumik suussuseqartut piviusunnngortinneqarnerannut pitsaassusissanik aalajangersaasoqassanersoq, kommunalbestyrelse aalajangiisinaavoq.

Imm. 3. Imm. 1 aamma 2 malillugit pitsaassusissat allaganngorlugit suliarineqassapput. Immikkut taamatullu innarluutilinnut politikkip ilaatut, § 86 naapertorlugu, kommunip nittartagaani tamanut ammasumik saqqummiussisoqassaaq.

Imm. 4. Imm. 1 malillugu pitsaassusissat Isumaginninnermut Naalakkersuisunut ilisimatitsissutitut nassiunneqassapput.

Imm. 5. Kommunalbestyrelsip imm. 1 aamma 2 malillugit pitsaassusissat pisariaqartitsineq malillugu aammalu minnerpaamik ukioq allortarlugu, iluarsaattassavai.

Imm. 6. Naalakkersuisut imm. 1 malillugu pitsaassusissat ilusaat imarisaallu pillugit maleruagassanik erseqqinnerusunik aalajangersaasinnaapput.

Kapitali 15

Aningaasalersuineq aamma akigititanik iluarsisarneq

Aningaasalersuineq

§ 88. Inatsisartut inatsisaat manna malillugu inunnut innarluutilinnut tapersiinnermut aningaasartuutit kommuninit akilerneqassapput.

Imm. 2. § 89 naapertorlugu, ulloq unnuarlu neqeroorutit ingerlanneqarnerat kommunit akigititamut akiliutaannit aningaasalersorneqassapput.

Imm. 3. Aningasartuutit Inatsisartut inatsisaat manna malillugu ulloq unnuarlu neqeroorutit pilersitsinnermut ingerlatsinnermullu tunngassuteqartut Naalakkersuisut akilissavaat.

Imm. 4. Aningasartuutit Inatsisartut inatsisaat manna malillugu namminneq najugaqaqatigiiffiutimik aamma najugaqarfutimik illersugaasut pilersinneqarnerannut ingerlanneqarnerannullu tunngassuteqartut, kommunit tamarmik immikkut akilissavaat.

Imm. 5. Inuk innarluutilik Kalaallit Nunaanni oqartussaasut tapersiinnermut Inatsisartut inatsisaat manna malillugu aallartinneqartumut aningaasartuutit atatillugu iliuuseqartussaataaneq aamma utertillugit akiliisarneq pillugit Naalakkersuisut maleruagassanik erseqqinnerusunik nunatsinni ingerlatsivimmi oqartussat allat isumaqatigalugit aalajangersaasinnaapput.

§ 89. § 48 aamma § 52 naapertorlugit, Inunnut innarluutilinnut ulloq unnuarlu neqeroorumi inissinneqartunut tunngatillugu, , kommunit akigititamut akiliuteqarnissaat ulloq unnuarlu inissiinnermut ataatsimut aningaasartalerlugu naatsorsorneqassaaq.

Imm. 2. Ulloq unnuarlu neqeroorut meeqqanut innarluutilinnut § 48 malillugu ulloq unnuarlu neqeroorumi inissinneqartunut kaasarfimmussanik atisassarsiuutissanillu tunniussissaaq.

Imm. 3. Kaasarfimmussanut atisassarsiuutissanullu aningaasartat kommunit akigititamut akiliutaanni ilaatinneqarput, imm. 1 naapertorlugu.

Imm. 4. Naalakkersuisut akigititamut akiliutissaq imm. 1-imi taaneqartoq pillugu maleruagassanik erseqqinnerusuni aalajangersaasinnaapput, ilanngullugit aningaasartuutit suut kommunit akiliutaanni ilaatinneqassanersut pillugu aalajangersakkat.

Imm. 5. Naalakkersuisut najugaqaqatigiiffinnut aamma najugaqarfinnut illersugaasunut Inatsisartut inatsisaat manna malillugu pilersinneqarsimasunut tamaginnut aningaasaqarnikkut nakkutilliinissamut pisinnaatitaapput.

Imm. 6. Naalakkersuisut imm. 2 malillugu kaasarfimmussat atisassarsiuutissallu pillugit maleruagassanik erseqqinnerusunik aalajangersaasinnaapput, ilanngullugit tunniussisarneq aamma aningaasartat annertussusissaat.

Akigititanik iluarsisarneq

§ 90. Akigititat Inatsisartut inatsisaat manna malillugu inatsimmi tunngavissinneqartut ukiumut ataasiarluni iluarsineqartassapput. Akigititanik ukiut tamaasa ulloq 1. januar naatsorsorneqartunik aalajangersaaneq Naalakkersuisut tamanut saqqummersittassavaat.

Kapitali 16

Aalajangersakkt allat

Kisitsisitigut paasissutissat

§ 91. Kommunalbestyrelse kisitsisitigut paasissutissanik assigisaannillu, Naalakkersuisut piumasarisaaannik nassiussinissamik pisussaaffeqarpoq.

Imm. 2. Naalakkersuisut kisitsisitigut paasissutissat assigisaallu nassiunneqartussat, imm. 1 naapertorlugu, annertussusissaat aammalu taakkua qanoq nutarterneqartassanersoq nassiunneqartassanersullu pillugit maleruagassanik aalajangersaasinnaapput.

Pineqaatissiisarnermut aalajangersakkt

§ 92. Inatsisartut inatsisaanni matumani aalajangersakkt naapertorlugit kommunalbestyrelsip oqartussatut pisussaaffiisa naammassinissaat annertuumik imaluunniit arlaleriarluni sumiginnarpagu imaluunniit qarsupippagu, Naalakkersuisut kommunalbestyrelse pinngitsaaliissummik akiliinissamik pisussaaffilersinnaavaa, ilanngullugit ullormut akiliisitsinerit.

Imm. 2. Pinngitsaaliissummik akiliisitsinerit Inatsisartut inatsisaanni matumani inatsimmi tunngaveqartut, Nunap karsianut tutsinneqassapput.

Misileraaneq

§ 93. Naalakkersuisut kommunalbestyrelsimit qinnuteqarfigineqarnermini, allaanerusunik tapersiinissaq aamma immikkut ittunik tapersiinissaq, aammalu allatut ittunik najugaqarfissatut neqeroorutunik pilersitsinissaq, akuersinnaavaat.

Imm. 2. Naalakkersuisut akuersissuteqarnermi misileraanerup nakkutigineqarnissaanut aalajangiisinnaatitaaneq pillugu aalajangersakkanik aalajangersaasinnaapput.

Kapitali 17

Atuutilersitsinermut ikaarsaarnermullu aalajangersakkt

§ 94. Inatsisartut inatsisaat manna ulloq 1. januar 2019 atuutilerpoq.

Imm. 2. Peqatigisaanik annertuumik innarluutillit ikiorserneqartarnerat pillugu Inatsisartut peqqussutaat nr. 7, 3. november 1994-imeersoq atorunnaarsinneqarpoq.

Imm. 3. Aalajangersakkt Inatsisartut peqqussutaanni imm. 2-imi taaneqartumi inatsisitigut tunngaveqartumik aalajangersagaasut, taakkua taarserneqarnissaasa imaluunniit inatsimmi matumani imaluunniit Inatsisartut inatsisaanni allami inatsisitigut tunngaveqartumik maleruagassanik aalajangersaanikkut atorunnaarsinneqarnissaasa tungaanut, atuutiinnassapput.

Kim Kielsen

